

東
華
續
錄

東華續錄

同治七十一

臣王先謙敬編

臣張式恭恭

閏四月戊申朔諭軍機大臣等前因李雲麟等奏詳酌新城事宜請豁免貢皮改設臺兵額兵等情當交原議王大臣等妥議具奏茲據惇親王等奏稱李雲麟等以前擬分歸新城之土爾扈特及烏梁海數旗見擬安設正臺各該旗一切差徭絡繹不絕請將應進皮張全行停止自爲體恤貢戶起見所有阿勒太烏梁海七旗應進皮張著准其暫行停止惟此項皮張爲內廷傳用及頒賞要需仍著該大臣隨時體察情形總期該處丁力稍充卽量爲變通設法補交以符舊制其烏梁海各旗內既有善獵槍手數百名可藉爲勁旅又有貢戶額兵多名該大臣等請將貢戶一項以百數

十戶改爲臺兵下餘五百餘戶作爲額兵儻能訓練得宜誠爲一舉兩得著卽照擬辦理仍著該大臣等按季認真操演務期悉成勁旅以資防勦不得有名無實臺兵遇有重差應用幫臺之人由各該旗貢戶以外之散兵閒丁中調派卽由該大臣等詳定章程妥爲辦理悼親王等會議原摺均著鈔給閱看將此由五百里各諭令知之○諭宋延春奏逆匪圍攻省城分股襲踞各州縣近日辦理情形請將從逆各員革職嚴拏各摺片逆匪攻陷易門縣後勾結內奸先後竄陷昆陽新興晉甯呈貢嵩明尋甸等州縣賊壘已偏省垣城下僅餘東路尙可繞越亟應趕緊援救岑毓英見由七旬進攻卽著該撫督飭各軍轉戰而前將逆股次第掃蕩力解省城之圍仍一面兼顧省東以通糧運宋延春卽飭楊盛宗等就見有兵力分路防勦迅殄逆氛劉嶽昭職任兼圻責無旁貸著懌

遵前旨星馳前進將省城防守事宜與岑毓英會商妥辦以固根本並著該督嚴檄李家福等統率所部迅速赴省相機策應從賊之參將楊振鵬楊先芝馬天順武進士田慶餘都司馬世德守備馬葵千總馬文成均著革職嚴拏務獲訊明後卽在軍前正法以昭炯戒母任一名漏網將此由六百里諭知劉嶽昭岑毓英並傳諭宋延春知之○予安徽被戕訓導金崧祭葬世職○己酉左宗棠奏臣於四月二十三日行抵鹽山城西十八里地方探悉賊由西南竄走乃改道向南旋接劉松山等報稱二十二日賊東竄至舊滄州方圖搶渡減河忽見大軍馳至喊黨西來迎拒宋慶率所部衝擊劉松山張曜向東截之槍礮轟擊斃賊甚眾鏖戰半時賊始敗竄折向東南以趨鹽山各軍追二十餘里收隊共計生擒悍賊一百餘名訊知賊之北竄意在天津覓購子藥且掣引追軍與

之俱北仍遂其竄撲運西之計劉松山等仍向東南追擊臣於二十四日馳抵甯津復接劉松山等馳報賊由鹽山掠樂陵而過邊馬已及德平賊蹤多向南竄臣以該逆意在西撲運河則吳橋較甯津爲要二十五日臣仍馳回吳橋連日偵探賊由臨邑平原向西南竄走二十七日已過高唐總兵郭運昌一軍已由恩縣躡追而南劉松山馬步各軍亦當距賊不遠矣賊既竄過高唐必由清平博平在平以撲運河臣得郭松林二十一日東昌函稱已築牆六十里丁寶楨十九日函稱牆工限十日竣事以時日計之則賊至牆成西岸防兵有所憑藉東岸追兵又可速至機局實爲湊拍賊如徑竄張秋不能越過則地勢愈偏滅之必矣臣仍暫駐吳橋地方北顧直隸運防南防狂寇回竄儻賊或竄過西岸尙可由德州橋口渡師西出以截其北竄上諭軍機大臣等賊之縱橫奔

突總思搶渡運河見在東昌沿運一帶牆工計已竣事追剿各軍不下十萬機勢實有可乘左宗棠務將運西力加扼守並商同英翰丁寶楨嚴飭劉松山等軍相機夾擊以爲且防且剿之計其臨清迤北等處並著李鴻章官文趕緊派撥隊伍前往填紮丁寶楨亦當督同郭松林等嚴扼張秋一路並與英翰所統各軍聯絡聲勢毋任匪蹤竄越如稍有疏虞必惟丁寶楨等是問至前敵調派事宜乃李鴻章專責該大臣務須嚴督淮湘各軍奮加剿擊依限滅賊迅奏膚功儻日久防疏致賊勢復形延蔓則咎各有歸朝廷不能爲之曲貸也英翰見赴觀音嘴一帶河下著卽將防務妥爲布置並籌進剿其張從龍一軍卽歸該署撫調度以厚兵力將此由六百里各諭令知之○諭鄭敦謹奏侍衛陳國瑞自請帶隊北援據情代奏一摺見在捻逆竄東境各路大軍雲集疊經諭令

該統兵大臣等速籌攻剿自當剋日殲除回逆雖向西趨距晉稍遠而西河一帶防務未可鬆懈該侍衛業經拔隊啟行著鄭敦謹飭令恪遵前旨迅速渡河將宜川等處防剿事宜相機妥辦毋得藉詞延宕致干重咎所有該侍衛進止機宜仍著歸鄭敦謹暫行就近調度嗣後如帶兵需人再行降旨令其北上也將此由五百里諭令知之○以邵亨豫爲內閣學士由詹事遷○庚戌廣奉天長春廳學額三名吉林廳二名○辛亥李鴻章奏臣於四月二十四日督周盛傳各隊由德州沿運河東岸北行察勘形勢並擬賊若沿運回竄就近截擊行次東光之連鎖接據潘鼎新等稟稱二十一日夜捻眾突至減河南岸盤踞各村直撲河牆善慶溫德勒克西暨吉玉成徐邦道等嚴堵橋口潘鼎新派張景春潘國揚等馳往援剿楊鼎勳亦派隊過河兜擊二十二日賊因防兵嚴整敗竄鹽

山一路等語是日午後左宗棠亦督軍追至河干劉松山張曜宋慶等遇賊回竄在舊滄州獲一小勝二十五日臣馳抵南皮探聞賊已掠樂陵而西二十六七日臣即往滄州捷地巡視河牆晤商善慶潘鼎新楊鼎勳等察看減河上游水勢尙旺惟下游呂橋東至海口數十里河身淤塞可由鹽山小徑鈔入潘鼎新等親督弁勇逐節挑濬以期引水入海使該逆無隙可乘臣飭各營妥速布置俟防務穩固潘鼎新仍抽隊出勦暫畱楊鼎勳駐守一面面商崇厚酌添津軍赴減河分段協守蓋守住滄州減河則天津萬無一失無須多兵駐防且不可使臣處游擊勁旅盡改作守兵也臣即於二十八日督隊南下二十九日行次德州之桑園與左宗棠函約相會面籌堵剿機宜意見均合閏四月初一日回駐德州偵知賊已由高唐西走夏津圖撲臨清東昌運河先准丁寶楨英

翰郭松林函稱東皖淮軍議分段落淮軍郭松林吳長慶等自東
昌城南守至張秋河口東皖各營自東昌以北分守至臨清上下
剋期趕築長牆惟河水淺涸可慮臣先派水師提督徐道奎統帶
樹字營並張樹屏等在張秋督勇挑濬淤河已報完工適黃水驟
漲三尺二十二日徐道奎等趕督勇夫開壩引黃灌運以裨防守
並調楚軍丁長春水師由張秋臨清駛入德州運河臣抵德時丁
長春礮船亦至面詢臨清以上河牆大致堅厚牆河水勢深淺不
等其淤淺處亦有水三四尺將來伏汛盛漲無難引水灌賊竊料
東昌上下河防有牆有水又有重兵逆騎必難飛越據各縣探稟
賊至東昌不得渡運又從高唐平原回竄二十九日已至禹城固
河一帶閏四月初一日向臨邑沙河莊狂奔仍圖北犯等語左宗
棠已飭劉松山張曜宋慶喜昌春壽相機兜擊臣過桑園時商令

程文炳迅帶所部前往與皖軍郭運昌牛師韓等合隊迎剿臣抵
德州後令周盛波周盛傳帶馬步親軍馳往陵縣一帶相機攔剿
俟各軍續有戰狀再行馳陳上諭軍機大臣等昨據左宗棠奏
賊由鹽山繞竄清平屢思渡運當經諭令左宗棠等嚴扼運防李
鴻章督軍剿擊茲據該大臣所稱各節是運防已穩固可恃自應
趕緊進兵以期迅就撲滅李鴻章既與左宗棠意見相同卽著將
堵剿機宜妥商籌辦萬不可失此機會東昌等處已有東皖淮軍
分段扼守卽著丁寶楨英翰分飭各軍實力堵遏以專責成官文
曾有飭令張樹聲在運西督辦民團之奏卽著嚴飭該臬司迅速
舉辦並遵奉前旨派撥隊伍前往臨清迤北等處填紮其滄州減
河李鴻章已函商崇厚酌添津軍分段協守卽著崇厚星速派兵
前往協防以便騰出勁旅專作遊擊之師左宗棠亦當遵奉前旨

嚴飭各軍力扼運西免致疏虞賊既不能突竄運河無虞挺走定可一鼓擒渠李鴻章所派各軍疊次獲捷卽著嚴檄各路將士乘勝追擊分投兜剿依限滅賊以竟全功將此由六百里各諭令知之○壬子諭軍機大臣等庫克吉泰劉典奏各軍剿賊連獲勝仗並見籌防剿情形一摺回匪竄擾陝境奔突靡常道員黃鼎一軍於四月初六日擊賊於涇州斃匪甚多當將城圍立解提督劉厚基等軍復在甘泉獲勝甘省回逆土匪先後竄至洛川等處總兵周紹濂一軍大獲勝仗剿辦尙爲得手該省西北一帶逆蹤靡定而西路回逆四五千由靈臺繞竄麟遊境內亟應嚴檄各軍分投進剿著庫克吉泰劉典督飭黃鼎等覘賊所向力圖掃蕩並飭劉效忠等由岐山等處進剿其宜君白水一帶逼近北路雖係殘匪尤應加意嚴防並著庫克吉泰劉典迅將該匪殄除淨盡以清

醜類將此由五百里各諭令知之○甲寅諭軍機大臣等崇厚奏
派兵防守減河請飭撥南路各軍赴滄協守一摺潘鼎新一軍見
經李鴻章調赴前敵進剿天津減河一帶僅有楊鼎勳一軍不敷
防守崇厚見飭余承恩劉景芳馳赴捷地減河並調李昌連練軍
兩營前往該處協防惟減河西自通運石壩東至祁口一百數十
里地段綿長民團稀少分布勢難周密津郡僅存陳濟清練軍槍
隊並遵化兩營兵力甚單未能盡赴河防著左宗棠李鴻章於湘
淮陝豫各軍內擇其轉戰日久應行休息之隊抽撥數營派赴減
河與楊鼎勳等軍協力防守既可保固河防並可以均勞逸左宗
棠見在吳橋尤當就近兼顧崇厚亦宜添募津勇設法協守並將
糧餉軍火由津運滄以資接濟該大臣等總須協力同心妥籌會
辦不可稍涉推諉致誤事機將此由六百里各諭令知之○丙辰

論軍機大臣等恭親王等奏特參侍衛不候調度請旨交部嚴議並請飭催余承恩迅赴減河協防各摺片前據鄭敦謹奏陳國瑞自請帶隊北援當諭令鄭敦謹飭令該侍衛懷遵前旨辦理宜川等處防剿事宜茲據恭親王等奏據該侍衛稟稱回軍北援於初四日馳抵臨河等語覽奏不勝駭異該侍衛係奉旨赴陝剿賊之員乃不候調遣擅行拔隊北上實屬任意自專陳國瑞著先行交部嚴加議處該侍衛見抵臨清卽著歸英翰調遣該署撫卽責令陳國瑞隨同進隊由北而南將此股捻逆痛加剿洗以贖前愆儆不能奮勇殺賊或任性妄爲不遵該署撫調度朝廷惟有執法從事不能再爲該侍衛曲貸也運河已穩固可恃防剿各軍不下十萬亟應乘此機會爲一鼓擒渠之計李鴻章務當懷遵疊次諭旨剋期掃蕩迅殄逆氛並著左宗棠英翰丁寶楨檄飭各軍分投防

勦以資厚集各該大臣督撫等毋得遷延觀望日久無功致負委任潘鼎新馬步各營見調爲遊擊之師滅河一帶僅有劉景芳五營甚形空虛頃捻蹤又近滄州亟應添兵扼守著官文嚴催余承恩迅率所部馳赴滅河一帶會同劉景芳協力堵禦崇厚於余承恩到防後酌度機宜妥爲布置潘鼎新既調赴前敵正與賊隊相迎著李鴻章嚴檄該藩司實力痛勦若復遷延觀望或避賊而行是既不任防又不任勦必當重治其罪運西一帶左宗棠官文英翰丁寶楨當認真嚴防不可稍涉疏虞將此由六百里各諭令知之○諭鄭敦謹等迅撥新疆餉糈○改廣東佛山同知爲簡缺裁瓊防同知並廣海寨主簿增設赤溪同知司獄各一撥新甯縣額進客童二名爲赤溪廳學額隸肇慶府學升廣海寨遊擊爲副將與那扶都司均駐赤溪升廣海寨守備爲都司移瓊州右營守備

於那扶撥欽州左營雷州左營千總把總各一惠州左營三江左營外委各一名標兵四百六十一名爲赤溪新營○豫親王義道卒予祭葬諡曰愼賞銀一千兩治喪○戊午諭軍機大臣等丁寶楨奏追賊接仗並築牆設守各情形一摺臨清東昌運防經東皖淮各軍趕築長牆分段設防足資扼守惟自臨清東北至德州一帶運防事宜尙未籌及李鴻章當與丁寶楨等設法兼顧以期布置周密毋任賊騎乘隙竄渡張曜宋慶與王正起等軍由清平博平等處追及賊股截其竄撲運河之路賊復折竄德平陵縣等處著李鴻章督催前敵各營與丁寶楨所部各軍儘力窮追並分路兜剿依限滅賊銘軍見抵東昌郭松林所部休息已久立著李鴻章飭令該提督進兵追剿作爲遊擊之師會合前敵各軍迅殲窮寇毋稍遷延本日復據崇厚奏稱滄州減河防務未周事機萬緊

一摺滄州開放減河石壩以運河水灌入下游因劉慶莊以下地勢漸高未能達海其山東海豐縣地方兼有直赴大沽海口捷徑一條又有地名岑子頭大路一帶直通天津葛沽鹹水沽等處見在減河營牆自石壩起至周慶莊止雖已築有營牆其周慶莊以下至祁口海河約四五十里水勢散漫深不過一二尺岑子頭大路並未淹沒該處營牆未立兼無兵隊駐守勢極空虛見潘鼎新軍向南進剿僅有楊鼎勳並劉景芳數營分布殊屬不敷防守著左宗棠李鴻章趕緊撥兵前赴減河下游海灘處所扼要駐防毋得稍涉疏虞致干重咎並著李鴻章檄令潘鼎新所部由北向南壓剿儘任賊蹤紛竄搶渡減河是潘鼎新既不俟接替有人置河防於不顧又不能遇賊痛擊遏其北竄朝廷必當重治其罪著李鴻章嚴飭該藩司實力堵遏以剿爲防毋蹈從前膠萊河故轍崇

厚亦當設法疏通劉慶莊以下河道並添募練勇扼守以助兵力
所不及東省所練西丹馬隊尙有一千五百名見在當已練熟能
否得力堪以調用著丁寶楨迅速具奏將此由六百里各諭令知
之○諭德勒克多爾濟等奏回匪肆擾請調兵籌餉一摺四月間
另股回匪馬拉拉又陷神木縣城並擾及鎮羌木瓜孤山等處董
伏祥股匪見在懷遠縣南山滋擾古城沙楞子僕牛川一帶賊匪
有由草地圖竄河口之說賊勢如此猖獗儻竟分股竄擾則薩托
清各境在在可虞邊防蒙古官兵近多疲弱恐不足以資堵截著
文盛杜嘎爾遵奉前次諭旨於察哈爾八旗內選派馬隊兵五百
名配齊軍械卽由杜嘎爾管帶前往綏遠城會同德勒克多爾濟
等相機攻剿力保嚴疆德勒克多爾濟等務就見有兵力探明賊
蹤分投堵剿毋令一匪竄越邊境並著轉飭貝子札那格爾第巴

達爾琿暨總兵馬陞等嚴飭各官兵竭力堵禦共圖保衛察哈爾官兵應需鍋帳火藥鉛丸等項著鄭敦謹寬爲籌解並無論何款先行籌撥銀數萬兩迅速解赴綏城毋稍延誤其沿邊沿河防剿各軍應需餉銀並著源源委解以資接濟將此由六百里各諭令知之○予直隸殉難教諭常純祭葬世職○己未廣浙江諸暨縣學額四名○庚申李鴻章奏閏四月初三日周盛波周盛傳各帶隊伍由陵縣東行二十里至鳳凰店卽遇賊馬往來其大股尙在五里以外我軍馬步結陣齊進擣其中堅賊眾驚走當令馬隊躡之沿途擒賊三十餘名奪回賊踞村莊二十餘處追至何家莊張逆突驅馬賊大股回撲我軍亦排陣迎之賊見官軍馬步併進旋又回竄大股直向東路奔馳並有賊騎分路折竄初四日劉松山張曜宋慶程文炳等軍橫出德州邀擊大勝擒斬數百人該逆由

東北敗向正東初五日劉松山張曜等跟蹤急追周盛波周盛傳慮賊回撲運防改由甯津向吳橋西南截擊初六日賊過海豐東北四十里忽折向西北劉松山宋慶張曜在慶雲東遇賊來撲鏖戰時許擒斬二百餘名初七日追過鹽山滄州交界是夜四鼓擒酋高老步等率四百餘人赴劉松山營乞降又有周老鳳率七十餘人赴張曜營乞降均經分別遣畱據降酋供張逆傳令各帶門板繩索欲向東光下口一帶搶撲運河適臣先派水師總兵丁長春赴下游巡防是日帶礮船駛抵下口初八日劉松山張曜等又追及下口迤東該逆正在搬運板片等件水陸各營分投截剿逆眾狂奔繞東光城而走劉松山等均循河東追殺沿途頗有斬擒該逆向西南奔竄仍欲由連鎮一帶搶渡左宗棠在吳橋聞信已於初七日督隊移紮連鎮河東臣出張秋調到提督徐道奎水師

飭由德州下駛初七日亦抵連鎮該逆偵知有備初九日繞由吳橋德州界內南走陵縣臣飭周盛波周盛傳率隊急追至陵縣西二十里之土橋賊騎二三千回拒周盛波督馬勇迎戰步隊趕到合力兜擊賊大潰奔擒斬百餘人聞侍衛陳國瑞是日亦帶所部由恩縣至陵縣截剿獲勝初十日據探賊已向西南平原高唐一帶竄走臣飭周盛波等乘勝跟追相機兜截劉松山張曜宋慶程文炳均帶隊過德州並令分路躡追賊趨西南我軍仍須傍運東節節牽制見在逆眾並無步隊每賊擄有二三騎替換避兵急走絕不戀戰勢急剽猾幸在運河以東一隅之地稍有限制但冀上下游運防加嚴游擊各軍再沿運兜追先使不得竄渡庶剿辦漸有歸宿 上諭軍機大臣等擒逆雖經周盛波等軍連日兜剿疊有擒獲而逆情慄猾仍向平原高唐一帶圖竄運西周盛波劉松

山張曜宋慶程文炳等軍相繼進剿卽著李鴻章嚴飭各軍乘勝痛擊大加懲創使賊氛漸衰得以一鼓殲除陳國瑞前有旨交英翰調度見在該侍衛既赴前敵距英翰較遠卽著李鴻章就近調遣該侍衛性情諒李鴻章素所深悉朝廷並無成見不過策其後效期其殲此殘寇該大臣自當不避嫌怨妥爲駕馭所需餉項並著李鴻章酌量接濟使之知感知奮運西各防關繫最要儻任賊竄渡則勢又燎原左宗棠英翰丁寶楨專任此事務當嚴飭各軍晝夜梭巡不使兵力稍有疏懈如任該逆西竄朝廷惟有執法從事決不能邀寬典吳坤修所派張得勝軍並水師四營卽著英翰派員迎提以厚兵力並著該署撫催令迅速啟程毋稍延緩劉銘傳計報啟程著李鴻章檄令迅速趕赴前敵統帶各軍共圖滅賊將此由六百里諭知左宗棠李鴻章英翰丁寶楨並傳諭吳坤修

知之○諭穆圖善奏親抵前敵先將狄道州境熟籌布置仍相機進剿一摺狄道州克復後鞏蘭一帶道途俱已暢行惟河州東南鄉之泰子寺巨巢未下其燕脂川黃家灣三甲集又路徑崎嶇匪蹤環紮康家崖新添鋪沙楞等處則爲入省最近之路賊匪於各該處對岸設有渡船隨時可至東岸官軍進攻之路止恃狄道附城之永甯浮橋穆圖善擬將各軍相度要隘分投扼堵著卽督飭將士相機規取以杜該匪後襲旁鈔之計痛埽賊氛並將康家崖一帶妥爲防範以固省垣狄道甫經收復民氣未蘇該署督仍當責令該地方官將善後各事宜悉心辦理毋滋事端據稱甘省糧餉奇窘各省協濟餉銀數月未到該署督卽遵奉本日批諭飛咨四川等省督撫迅將應解協濟餉銀如數籌解以濟軍食將此由五百里諭令知之○飭四川等省迅解甘肅協餉○辛酉諭軍機

大臣等富明阿奏請飭理藩院嚴催各盟長迅將越旗種地蒙古收回一摺郭爾羅斯蒙古越旗種地一案自經查辦後業已明定章程見除哲里木錫林郭勒等旗遵旨收領外昭烏達等旗所派各員尙未一律到齊卓索圖一盟迄今並未派員前往其喀喇沁前派各員又稱係會同查辦事件並非收領各戶該員等隨即回旗各該盟於收領越旗各戶任意耽延難保不令眾戶又起種地之念致生事端且官兵在彼久候收領無期徒耗鹽糧實屬不成事體著理藩院行文各該旗嚴催各盟長迅速派員務將越旗種地各戶剋期領回不准該委員等沿途逗畱再滋延誤其有不能收領願在郭爾羅斯公旗安置者卽照原定章程辦理以弭弊端原摺著鈔給閱看將此諭令知之○壬戌諭軍機大臣等李鶴年奏捻逆圖撲運西督軍守禦南路匪徒突起派兵剿捕並請飭釋

放降人家屬各摺片擒匪由德州恩縣駛至博平往平等境仍圖撲越運河避兵西竄見在臨清以南至張秋鎮經前敵各軍分投扼剿足資堵禦惟張秋一帶河水淺涸難保該逆不鉅險疾趨希圖竄越豫境東路之防亟應早爲戒備卽著李鶴年迅飭在防將領妥籌布置嚴密扼守與東省各路官軍互相策應以期有備無患豫省南路匪徒花得春等糾眾焚掠自泌陽石河寨等處竄至裕境顧張店旋向東南檀木溝一帶盤踞該處與角子山相近向爲匪蹤出沒難保匪徒不竄往該處負隅抗拒且匪眾雖僅百餘人恐糾聚日久裹脅愈眾勦辦益形棘手該撫見調原派防守黃河之歸德鎮標兵一千名交總兵崔廷桂管帶馳赴南陽一帶勦辦著李鶴年嚴飭該總兵會同該管鎮道合力兜擊務將首夥各匪悉數殲除毋任一名漏網致貽後患降人桂錫楨旣據該撫奏

稱疊次打仗出力察看情形實屬革面洗心毫無疑貳卽著該撫飭知該降人奮勉立功力圖報效儻能隨同官軍剿平捻逆朝廷必當破格錄用以獎勤勞所有該降人家屬著俟捻匪剿平後再行釋放將此由五百里諭令知之○諭曾壁光奏剿賊獲捷擒斬巨逆並攻克廬山賊巢各摺片川楚各軍攻破覺林寺偽城生擒逆首朱明月與劉崐前奏大略相同賊首楊老冒等突竄札佐班竹園一帶經張文德督飭各軍分次剿擊陣斬偽元帥楊老冒斃賊甚多在事出力員弁著曾壁光擇尤保獎候旨施恩仍著飭令張文德等會合川楚各軍率得勝之師迅克偏巢將平甕龍貴各賊巢次第底定早奏膚功定番文武各員擊退逆匪攻克廬巢在事出力員弁紳團著曾壁光擇尤酌保毋許冒濫逆首陳喬生由龍里逃竄仍著飭令在事各員實力搜捕以期淨絕根株一面將

飭該廳州將防守事宜認真籌辦。出稍大意將此由五百里諭令知之。○癸亥諭軍機大臣等庫克吉泰劉典奏陝軍剿賊獲勝並籌堵竄匪情形一摺。隆坊白水等處賊匪經周紹濂周金品等軍連日獲勝並將敗竄中部之賊悉數殲除其竄擾宜君之賊復經高連陞疊次獲勝劉厚基克復延長劉端冕將郿州洛川之賊擊敗舊縣槐柏鎮等處賊勢最重亦經周紹濂奮力痛剿大挫賊鋒。剿辦尙屬出力總兵周紹濂周金品等所部尤爲出力員弁准庫克吉泰等擇尤彙保毋許冒濫。回逆大股由靈臺竄至鳳翔眾約數萬劉典見擬赴鳳郡督戰若卽檄調各軍痛加剿洗力遏狂氛毋任蔓延至陝境北路回匪前據德勒克多爾濟等奏稱復將神木縣城攻陷擾及鎮羌一帶意圖竄出口外見在晉省薩托清各城防務甚形喫緊著庫克吉泰劉典迅速籌撥兵勇將延榆一帶

同匪實力勦洗嚴扼沿河沿邊要隘毋任竄入晉境致成不了之局是爲至要將此由六百里各諭令知之○諭瑞麟嚴緝廣東會匪○予陝西陣亡知縣宋良等祭葬世職○甲子諭軍機大臣等富明阿奏俄界匪人聚眾攻殺俄兵見飭副都統赴琿春會商俄官勦辦一招俄界漁戶雖係中國人民而敢於焚卡作亂其爲不安本分已可概見富明阿見令烏勒興阿訥木津等派兵嚴防要隘遇有匪人拏獲囚禁以備對質所辦尙合機宜卽著該將軍嚴飭烏勒興阿等慎守邊隘毋任匪徒闖入肆擾儻該匪被俄兵擊散逃入琿春境內卽飭盡數剿除旣可綏靖邊境亦不至啟釁封所有富明阿續派全福所帶官兵並著前赴琿春交烏勒興阿調遣以備策應將此由五百里諭令知之○諭英翰奏運防布置已定見飭各軍合隊進剿請訓安住赴營各摺片運防長牆經英

翰督軍修築完塹自清平縣境之李家園起至臨清地上之衛河
口止見已沿邊排營分段扼紮南路東淮各軍分防地段亦已竣
工著左宗棠李鴻章英翰丁寶楨悉心籌商嚴檄兵勇認真守禦
毋令該逆竄過運西儻然由何路竄出卽將何路防軍治以應得
之罪臨清迤北河牆民團見已興工著李鴻章官文嚴催臬司張
樹聲等迅速布置剋期蒞事並令李鴻章另派得力將弁前往堵
扼毋稍疏虞捻逆見已竄至清平之蔡屯孫梁莊等處乘雨搶撲
戴家灣運防經張從龍等軍擊退英翰見擬親往督剿卽著星馳
前進與左宗棠李鴻章等會籌剿辦該大臣等當懷遵疊次諭旨
依限滅賊迅掃逆氛用副委任陳國瑞已至英翰軍營該署撫當
勸以大義俾知奮勉圖功毋得觀望遷延自干罪戾安住一軍見
已飭令西紮保定另候調遣毋庸前赴英翰軍營將此由六百里

各諭令知之○諭金順葵遵籌進剿暨逆首乞撫及官軍擊賊獲勝各摺片金順馳抵定邊進剿兵力尙虞單薄著督飭總兵胡世英先就見有兵力將回逆盡心剿洗以孤陝北賊匪之勢蒙古地方水草缺乏著一面趕籌行糧卽酌畱隊伍分守花定等處剋日東進相機剿辦並著庫克吉泰劉典迅派得力將弁統帶勁旅馳往會剿以期聯絡聲勢毋稍遲延董幅祥爲陝北著名首逆據金順奏稱該逆率眾投誠果能立功自贖不妨予以自新但賊情叵測難保非藉乞撫爲緩師之計著金順咨商穆圖善劉典悉心察看妥爲辦理斷不可墮其狡謀清水營西北五里墩竄賊經官軍擊退金順見在親往督剿著卽激勵將士迅殄逆氛將此由五百里各諭令知之○諭崇實奏川師援黔屢勝見任添派防兵出境助剿一摺劉嶽曙蹇閣唐炯等軍抵黔境後收撫降眾疊下松煙

鏖等處賊巢並會楚軍生擒首逆張保山及賊目多人唐炯復乘勝馳抵湄潭之偏刀水與蹇閣等約期進取於牛矢溪連獲大捷見已進規水源溝橙木圍會同楚軍分取龔家營觀音營聲勢尙覺聯絡崇實復添派川兵分出涪南以趨正安婺川卽著檄飭唐炯等督率各軍分投進攻迅圖掃蕩並著劉崐飭令席寶田等與川軍併力夾擊毋得互相觀望致隳前功曾璧光亦當嚴飭黔中將士及各屬紳團聯絡聲援廓清黔境崇實另片奏唐炯一軍攻勦正當喫緊未能兼辦善後等語唐炯見在督軍圍攻偏刀水老巢將來尙須渡江而南進規王華山尙大坪等處所有善後事宜自未能一人兼顧著劉崐迅派廉明勤幹之員專辦貴東善後事宜以期周妥其川師平定處所撫輯亦關緊要並著曾璧光另派妥員次第經理唐炯卽責令專事進勦痛殄逆氛將此由五百里

各諭令知之○諭山陝各省籌撥金順軍餉○乙丑諭軍機大臣等李鶴年奏官軍剿賊獲勝派兵赴東昌協防並籌辦土匪一摺張曜等軍會合劉松山春壽等馬步各隊於上月在甯津等處追賊疊有斬擒偪賊東趨見在捻逆竄向清平一帶屢圖搶撲運河運西防守事宜極關緊要該撫已檄馬德昭馳赴東昌協同扼守卽著飭令該提督迅速到防聽候李鴻章調派不得稍涉遲延泌陽土匪嘯聚業經李鶴年派令總兵崔廷桂馳往剿捕並著飛飭該總兵乘此匪勢未張妥速設法殄除毋使滋蔓所陳暫駐滑縣相機進止情形該撫務當隨時斟酌緩急會合各路大軍防剿兼籌不可稍事拘泥致失戎機是爲至要將此由五百里諭令知之○諭丁寶楨奏官軍追賊疊勝見飭王心安追剿一摺捻逆竄至臨邑經民團接仗丁寶楨飭旅之營官劉時霖等直突賊陣該逆

獲卽敗退狂奔復經官軍連日追剿擒賊百數十名奪獲馬二千數百匹馬鞍一千數百副洋礮旗幟數百件逆首張總愚僅隨數十騎向西北潛遁與全股匪眾幾至相失剿辦甚爲奮勇此次東軍追剿數日賊竄吳橋東光又竄平原高唐茌平均與左宗棠李鴻章大營相近若能派兵迎剿張逆卽可就擒何至復令竄遁左宗棠李鴻章等未免心存膜視軍務何日得了該大臣等務當激發天良嚴飭各軍實力會剿毋得各分畛域致干咎戾英翰亦當飭令所部會同馳擊不得稍存觀望至臨清以北武城夏津恩縣德州暨直境之吳橋東光等處運防著左宗棠李鴻章等迅派得力將弁聯絡民團嚴密扼堵毋稍疏虞將此由六百里各諭令知之○諭德勒克多爾濟等奏沿邊蒙兵堵截不力賊匪逼近河干請飭山西巡撫撥兵迎剿並請截畱文麟等軍營餉銀及動碾

歸化廳倉穀各摺片陝回竄陷神木高家堡後盤踞烏紳旗分擾
府谷縣等處竄入準噶爾旗界並有賊匪竄踞十里長灘及巴漢
圖地方距托克托城不遠河防萬分喫緊卽著該署將軍等嚴檄
札那格爾第激勵諸軍相機攔截一面飛飭馬陞督率兵勇嚴守
要隘其烏喇特三旗無險可扼並著設法嚴防以遏東竄杜嘎爾
計已帶兵啟程著卽趕緊前進會同德勒克多爾濟等迅籌剿擊
綏城需兵甚亟著文盛再行酌撥察哈爾馬隊兵數百名派員帶
交德勒克多爾濟杜嘎爾等調度以資厚集匪蹤趨向靡定儻竟
越河分擾則晉疆岌岌可虞鄭敦謹務當抽撥勁旅遴選得力將
弁管帶取道河保傍河北上迎頭截擊毋任闖入薩清托等廳所
管地面遼闊又無城堡可守所有扼要防堵及稽查奸宄彈壓匪
徒各事宜著鄭敦謹遴派結實可靠之員前往各該廳協同辦理

以資得力並著劉典迅咨金順帶兵由神木等處跟蹤追剿以孤賊勢此次賊偏河干蒙古官兵堵截不力著德勒克多爾濟等查明據實參辦陳國瑞所部見在山東剿賊所請調由吉州迎剿之處著毋庸議山西撥解文麟等軍餉銀五萬兩卽著照該署將軍等所請暫行截留應用仍著鄭敦謹於應解歸綏餉內迅撥銀五萬兩解赴歸綏轉解文麟等軍營毋稍延緩歸綏廳常平倉存穀二萬八千餘石著卽咨明鄭敦謹檄飭歸綏道迅行動碾提運以濟軍食將此由六百里各諭令知之○諭成祿奏遵旨部署出關請催楊占鼐赴肅接替暨酌撥甘涼米石迅催川省協餉及請飭派員辦理糧臺各摺片關外盼援甚急疊經諭令成祿俟楊占鼐到肅卽趕緊出關楊占鼐奉旨已久何以尙未到營著穆圖善催令迅速帶隊馳往接辦防剿毋許遲延成祿著一面趕緊部署俟

楊占鼇到肅後卽行拔隊馳往哈密等處盡心勦辦不得藉詞逗
畱自干重咎鎮西一軍著准其統帶出關以厚兵力該提督出關
後自應多備餉糈所有前請飭撥倉糧十萬石內未經解到七萬
石著穆圖善在甘涼屬下再行分撥數萬石並著先期籌備裹帶
以裕兵食上年諭令四川先撥銀十萬兩解交成祿軍營迄今尙
未解到著崇實查照前撥餉數剋期解交毋稍延緩並著穆圖善
遴派得力道府一員前赴該提督行營辦理糧臺事務以資臂助
將此由六百里各諭令知之○予山東陣亡總兵官朱發典等祭
葬世職○丙寅諭軍機大臣等英翰奏官軍先後獲勝並追勦情
形一摺程文炳牛師韓在高唐擊賊獲勝陳國瑞由陵縣平原追
至高唐連獲勝仗莫組紳陳國瑞復於在平夜襲賊營疊獲大勝
勦辦均屬認真賊匪無日不遇官軍疊遭挫敗勢已窮蹙正可乘

此機會合刃殄除著左宗棠李鴻章李寶楨英翰督催各路官軍
會合兜剿迅殄賊氛一面飭令防河將士嚴密扼守毋任竄渡河
西再致蔓延此次東皖及陳國瑞等軍剿賊均各盡力李鴻章等
所部各營何以並未接仗該大臣等務當振刷精神力圖會剿以
期速就蕩平不得任聽各將士遷延觀望自干咎戾陳國瑞剿賊
奮勇所需軍火糧餉著英翰隨時接濟馬步各隊並著該署撫酌
撥數營歸其統帶以厚兵力兼飭程文炳牛師韓等軍與該侍衛
合隊實力痛剿俾竟全功將此由六百里各諭令知之○丁卯左
宗棠奏臣前因捻逆圖由東昌竄越運河北窺東昌一帶牆工已
成防軍厚集追軍又緊躡其後度不得逞遂向東北疾趨仍圖撲
直隸運河臣時在吳橋慮直隸運河地段縣長防軍單薄所恃居
民羣萃西岸自相圍結憑河固守惟中段連鎮上下數十里閒居

民星散牆工未興又值運河水勢漸落局勢懸殊臣於閏四月初六日夜率親軍五千銜枚急進初七日馳抵連鎮探騎還報數十里內尙無賊蹤因包連鎮築壘開濠屏蔽要津以重形勢並移全軍駐之初八日賊騎由南皮界竄至東光縣境將犯連鎮大隊距連鎮已不過三十餘里臣一面促修濠壘一面派騎兵分途偵之遇賊邊騎擒獲老賊牛憬兒等及從前官軍被擄者共二十餘人訊知賊意直注連鎮途閒聞連鎮已有官軍駐紮改向正南急趨各起邊馬亦均折回南竄是夜臣復引軍赴吳橋初九日馳抵西關則賊已由吳橋進東南向南竄去比劉松山張曜宋慶程文炳郭運昌春壽喜昌馬步各軍馳至吳橋則已無及臣以連鎮緊要所築牆濠未固是日仍馳回連鎮察度賊情妄思竄越運河西岸別覓生路如運西防固則猛撲滅河亦在意中竊維防剿各軍均集

德州臨清東昌一帶此外惟滄州減河駐有楊鼎勳一軍余承恩
劉景芳各營約計馬步尙有一萬四五千而運西則僅劉祺三營
明慶博崇武馬隊兩起臣屢奉諭旨嚴扼運西所部亦祇親兵五
千人見駐東岸連鎮以剿爲防除守壘外出隊八成不滿四千之
數且防且剿兵力不敷見在各軍任防者約六七萬前敵之軍除
劉松山郭寶昌喜昌馬步三軍外尙四萬有奇聞陳國瑞帶來勇
丁亦一萬二千有奇是南路防剿之軍多於北路不止數倍近奉
諭旨又須酌撥數營分防減河藉資休息而揣度賊勢旣不得逞
於南必仍肆志於北待其旣北而防之必落賊後且劉松山喜昌
馬步兩軍由陝西山西河南直隸以至山東與剽猾之寇相追逐
兵馬寶形勞頓若不及時稍予休息誠恐無益有損其張曜宋慶
程文炳春壽馬步各軍均已咨交李鴻章調度見正緊躡賊蹤向

西南追剿臣見調劉松山移軍回紮東光縣北二十里下口一帶郭運昌紮柳莊一帶北距減河七十里分劉松山所部提督黃萬友兩營總兵章合才一營馬隊一營及郭運昌所部一營合共五營前赴減河運河交接地方分紮一面咨提督楊鼎勳將見駐減河口之營勻縮十里向東移紮以便劉景芳余承恩等營接遞勻減移向東北以期周密黃萬友等馬步五營所以移紮減河偏西十里者以其地防務緊要黃萬友宿將可恃又本係劉松山軍中分統之員一軍分紮聲息時通可期聯絡也其減河東北濱海各處乞飭下崇厚將見紮豫軍勻撥分紮以期周妥再查減河洩運入海河形係向迤北其入海之處距津郡不過數十里賊如窺伺東北似天津之軍亦可馳往策應以壯聲援津郡既恃減河爲外護臨時派兵策應減河防軍卽所以固津郡之防較之增調久戰

疲勞之軍更爲可恃至劉松山郭運昌喜昌馬步數軍雖暫時分減運之防兼資休息然揣度賊情不久必仍將北竄尙可易尾追之軍取攔頭橫截之勢於剿局不無微助又奏據劉松山張曜宋慶春壽喜昌稟報閏四月初四日追賊至德平李家莊賊不及防我軍分三路並進合力夾擊賊敗奔數里值小港橫前各軍蹙之生擒賊目楊沅等及悍賊一百二十餘名劉松山所部總兵宋發興宋慶所部守備李學文均深陷賊陣中礮殞命賊敗向東北轉向正東竄走初六日竄過海豐東北四十里復折向慶雲縣東北劉松山等追及騎賊二千餘忽拌死回撲劉松山麾所部奮勇衝殺立斃執旗騎賊數十名張曜復由閭家莊繞出賊後宋慶與春壽喜昌亦由大李莊橫截而出賊遂敗潰斃賊二百餘名初七日追過鹽山至滄州界是夜捻首高老步韓錦生等率黨三百餘人

周老鳳率黨七十餘人詣劉松山軍前乞撫訊知賊中洵懼殊甚張總愚喉各賊擄板片繩索向泊頭下口一帶搶撲運河劉松山等立即拔營於初八日馳抵下口附近見賊方搶運板片箱櫃劉松山等馬步並進賊勢不支折向西南紛竄劉松山等循東岸追殺三十餘里至東光縣南沿途共斃賊數百名生擒三十餘名賊方擬搶撲連鎖間臣軍已移紮連鎖遂繞由梁家集撲吳橋適臣由連鎖徑趨吳橋劉松山等各軍亦躡追而至賊又從東逸去所有陣亡之總兵宋發興守備李學文仰懇天恩飭部從優議卹以慰忠魂上諭軍機大臣等捻逆見竄在平高唐博平等處疊經東皖及陳國瑞各軍擊敗該逆圖竄運西不遂勢必仍折而北向東光吳橋及天津減河一帶搶渡左宗棠分防地段自吳橋至滄州捷地減河一百六十餘里僅止親軍五千人並劉祺三營及

明慶博崇武馬隊兩起兵力較單該大臣見調劉松山移軍回紫東光所屬之下口一帶郭運昌一軍移紫柳莊一帶並分劉松山所部黃萬友章合才四營郭運昌所部一營前赴減河運河交接地方駐紮兼令楊鼎勳將所部見駐減河口之營勻縮十里向東移紮以便劉景芳余承恩等營節遞勻減移向東北籌辦尙屬妥協至減河下游入海處所距津郡僅數十里該處防兵卽可由津軍內就近撥往崇厚卽撥津軍各營並添募勇丁前赴下游河岸嚴密扼守毋稍推諉左宗棠崇厚既經專辦防務卽當加意嚴守不得稍涉疏懈其進剿事宜卽著責成李鴻章認真辦理務當督飭見有前敵各隊並陳國瑞一軍儘力追殺與各處防軍互相策應俾得迅殄賊氛春壽所統馬步各軍著李鴻章飭赴減河一帶協同防守如遇賊蹤北竄卽可迎頭截擊並與喜昌所部馬隊聯

絡聲勢以戶兵力將此由六百里各諭令知之○予陣亡總兵宋發興等祭葬世職○己巳諭軍機大臣等庫克吉泰劉典奏西北兩路各軍勦賊疊勝甘回竄陝見籌防勦林壽圖奏甯州合水失陷情形各摺片提督劉端冕在鄜州道左鋪等處督軍進勦斃賊甚多賊向西竄其分擾汧隴麟鳳之賊亦經蕭德經羅洪德等迎擊獲勝董志原回逆與土匪潰勇連陷慶陽甯州各城悉由靈臺南竄武功渭河一帶亦有賊蹤劉典見由醴泉移紮咸陽係爲兼顧陝垣起見惟逆眾傾巢竄陝意圖就食鳳境而中宜鄜洛等處賊燄方張若不亟圖掃蕩勢必聯成一片進勦愈難著庫克吉泰劉典嚴檄劉端冕等軍分投攔擊迅殄逆氛劉典卽由咸陽督飭魏光燾等併力西向毋得株守一隅致賊勢日形延蔓林壽圖奏稱甯州仍爲賊踞慶郡守城官兵敗遁各情署甯州知州凌光漢

於州城失陷時隱忍偷生實堪痛恨著穆圖善迅速查明從重參辦署合水縣知縣楊炳華力戰捐軀亦著查明請卹逆酋禹得彥等糾黨圖逞並著穆圖善等咨令雷正綰實力堵遏毋稍疏虞雷正綰軍營糧餉林壽圖務當隨時接濟以贍軍食慶陽地方緊要知府員缺豈可久懸穆圖善亦當遴派妥員前往莅事以資撫輯將此由五百里諭知穆圖善庫克吉泰劉典並傳諭林壽圖知之○予陝西傷亡同知李卿林等祭葬世職○庚午李鴻章奏閏四月十一日逆匪南竄高唐在平界內陳國瑞在天官廟鈔出賊前擒斬甚多殲斃逆首陳熊一名十二日東軍王正起等在往平接仗獲勝張曜宋慶適至夏津東南一帶攔截賊騎散漫徧野宋慶等突出猛擊大股倉皇折走生擒騎賊五十餘名皖軍程文炳牛師韓等是日亦在高唐迤西截擊疊有斬擒十三日陳國瑞遇賊

於在平清平之交竭力勦洗賊不戀戰向東潰走十四五等日又竄禹城平原一帶昨又由陵縣之南竄往臨邑據生擒賊供逆情窘迫時圖搶渡運河見在連旬晴燥張秋黃河口業已斷流東昌臨清卽河淺涸殊甚東皖淮軍聯紮牆濠布置綦嚴兵力較厚似尙無虞自臨清北至滄州運河上通衛河雖有來源日落水二三寸西岸直東民團均集紮牆官文派臬司張樹聲道員歐陽正墉丁寶楨派候補道王成謙等分投督催臣添派直東紳士道員李逢春裴德俊提督傅振邦前往會同督勸以冀剋期集事昨因水淺賊近德州上下牆工閒有斷缺之處潘鼎新帶隊由減河來德飭令先其所急撥往景州東岸分飭弁勇過河替修吳橋至景州長牆三十餘里又令周盛傳帶隊由四女寺過河替修故城至德州長牆五十餘里運西團勇見官軍通力合作愈增踊躍旬日之

開河竣工惟河道過長自連鎮北至滄州西岸有京營馬隊直
省練軍協同民勇分段防守連鎮南至臨清數百里則專恃民團
強弱不齊未盡可靠各省客軍俱在前敵本難分撥且南勇與北
人本不相習民團既不願與之雜處客軍亦不能全行替防再四
籌維惟有揀派各軍輪替出擊更番休息其休息之軍卽在河岸
擇要屯駐俟賊竄近立卽迎擊以勦爲防左宗棠已派劉松山郭
寶昌喜昌等軍自連鎮北至滄州減河東岸分紮與捷地楊鼎勳
等軍聯絡策應臣亦派張曜宋慶分紮夏津高唐一帶程文炳紮
陵縣吳橋一帶遇賊回竄整隊截擊兼爲運防遮護臣前因北運
河寬深廠船可以得力咨商曾國藩調長江水師提督黃翼升督
帶數營前來助防昨准曾國藩咨覆已令黃翼升統淮揚水師五
營北渡張秋候調日來黃水消落各廠船阻滯張秋不得進口早

晚若得大雨河水增漲礮船可至運防較有把握東昌以南前派郭松林往紮嗣因進剿喫緊先令道員丁壽昌帶銘軍北來替防但該處運河極涸水僅數寸仍虞地廣兵單已咨商河南撫臣李鶴年將兗守滑縣之提督馬德昭六營調往東昌以南與丁壽昌聯絡布守據報業經啟程郭松林昨已帶隊抵德臣令與潘鼎新善慶春壽溫德勒克西及侍衛陳國瑞等會合由陵縣前進覘賊所向併力痛剿以期早就殲除又奏據張曜宋慶稟稱閏四月十八日追賊至臨邑縣境適該逆由東北折向西南時當薄暮因飭各營潛伏樹林宋慶親率劉廷等張曜親率賈慧山等選帶精銳銜枚疾進匪眾正在搶踞村莊我軍分投猛擊逆首張總導等率黨抗拒官軍奮力衝殺該匪敗歸村莊復經劉廷督率馬玉坤等由左路進李永芳等由右路進攻破賊踞村莊十餘處悍賊殺斃

無遺張總愚仍率全股來援張曜宋慶督隊猛擊該逆且敗且走
繼爲河溝所阻倉皇搶越我軍乘勢追壓賊大潰奔宋慶等追殺
二十餘里始行收隊生擒四百餘名斬馘約千餘名並獲賊酋最
瑣李鳳林二名解散脅從甚眾餘眾向東北逃遁等情臣查宋慶
等軍最善夜戰近來賊情剽猾見兵卽走白晝追逐難得接仗晚
間必離官軍數十里外國聚露宿宋慶等諷得其情乘夜襲剿有
此快捷足塞逆膽惟賊技愈窮圖竄愈速難保非引我軍追往東
北忽折而西伺隙撲運臣屬臣曜等俟郭松林等軍前進接追該
軍暫行回扼高唐夏津一帶待賊回竄相機攔剿兼可遮護運防
所有該軍此次戰勝尤爲出力將弁可否懇恩准臣查明存記彙
案請獎以示鼓勵又奏前奉諭旨劉銘傳計報起程著令迅赴前
敵統帶各軍共圖滅賊查臣自前次奏催劉銘傳不營正深盼望

旋接該提督函稱左骹瘡毒復發赴六安州就醫潰出膿血數升疼痛異常步履維艱見在趕緊醫治一俟瘡毒收口卽力疾就道斷不敢有意遷延等情查劉銘傳素性直爽尤不慣以清閒自處聞其左骹瘡毒係名跨馬癰若不卽愈於戰陣馳驅固非所宜據稱瘡疾收口卽行就道爲期當不甚遠見在運河圍局漸成逆情窘迫思竄如果河水旺發師船並集在事諸將帥均以防務爲重使猛撲不過諸軍就地協力痛剿可冀殲滅有期若各軍皆圖進剿不顧其後賊騎飄忽無定恐乘水淺之時空虛之處亡命衝突亦意中事此不可不慮者也 上諭 畢機大臣等王正起陳國瑞等軍在荏平高唐等處剿賊獲勝程文炳牛師韓在高唐截擊張曜宋慶在夏津東南攔截亦均有斬擒賊匪見由陵縣以南竄往臨邑著李鴻章檄飭追軍與該處團勇合力兜剿痛加殲戮毋任

喘息東昌臨清牐河水勢淺涸李章見調馬德昭一軍前赴京
昌助守著卽督飭在防各軍聯絡聲勢協力防堵毋任賊眾竄越
河牆臨清牐河以下運防並著設法嚴密布置毋稍疏漏張曜宋
慶在臨邑剿賊大勝所部出力將士准李鴻章存記彙案保奏劉
銘傳見患骸疾著李鴻章催令趕緊醫治一俟痊愈卽檄調赴營
毋任遷延自便見在賊勢漸形窮蹙李鴻章正當乘此機會督飭
諸軍更番輪擊以期迅速蕘事若僅知防守運河置進剿爲緩圖
必致賊燄復張辦理更難措手李鴻章務當一面防守一面追剿
不可顧此失彼致失機宜另片奏請將陳國瑞營軍餉由山西等
省撥解本日已寄諭鄭敦謹等接濟矣該侍衛前已有旨令李鴻
章調遣著該大臣卽檄令力洗舊習奮勉立功以觀後效如其故
智復萌不遵約束李鴻章亦常隨時參奏所請將桂錫楨兄子釋

放之處桂錫楨勦賊出力如果始終不懈俟軍務完竣時自當將該革員家屬全行釋放並將桂錫楨加恩獎勵也將此由六百里諭令知之○諭鄭敦謹奏河保喫緊分飭堵禦並請飭陝省另調一軍駐紮榆林各摺片前據德勒克多爾濟等奏賊匪攻陷神木擾及府谷等處當經諭令鄭敦謹派兵取道河保迎頭截擊茲據該署撫所陳各節與德勒克多爾濟等前奏大略相同見在陝省之邊內草地均有賊擾晉邊內之河保口外之清托薩包等處同時喫緊該署撫雖已咨明綏遠城將軍添兵嚴防口外沿河各處其河保沿邊各處已飭在防文武各員弁分投堵遏布置漸能周密惟防務萬分喫緊非有大員親往統率不能聯爲一氣見在潞澤防務較鬆著鄭敦謹另派妥員駐守卽行馳往河保一帶擇要扼紮嚴督在防各將士加意梭巡實心堵禦儻有稍涉疏懈者

卽督該署撫嚴參懲辦毋稍姑容陝省賊氛日熾晉省河保各邑暨薩托清等城更形喫緊著庫克吉泰劉典遵奉前旨迅撥得力兵勇將延榆等處回匪實力剿洗卽著駐紮榆林嚴扼沿河邊隘與晉省防兵互爲聲援毋稍疏失將此由六百里各諭令知之○諭山西迅解巴里坤軍餉○命榮全奎昌李雲麟會同俄官建新疆毗境界牌鄂博○辛未諭內閣盛京將軍都興阿著管理神機營事務授爲欽差大臣馳赴天津等處會同左宗棠李鴻章勦辦賊匪所有春壽陳國瑞張曜宋慶四軍馬步各隊均歸調遣其餘吉林黑龍江馬隊並著都興阿酌量札調都興阿所請隨帶之侍衛興凌等均著准其帶往三口通商大臣兵部左侍郎崇厚著幫辦都興阿軍務兼籌糧餉軍火以資接濟仍駐天津督辦防守事宜前有旨諭令左宗棠李鴻章限一月內滅賊迄今限期已滿賊

股仍未殲除實屬督剿不力均著交部嚴加議處仍責令該大臣等會同都興阿協同剿賊務將此股捻匪迅速殄滅毋再遷延致干重咎都興阿未到以前該大臣等仍當嚴飭各將領認真防剿毋稍觀望致誤戎機○諭軍機大臣等前因捻逆竄擾直東大肆倡獮疊經諭令左宗棠李鴻章督兵剿辦並立定期限令於一月內剿辦淨盡見在限期已滿而賊匪全股尚未蕩平仍復奔突自如該大臣等辦理毫無成效本日已明降諭旨將左宗棠李鴻章交部嚴加議處並令都興阿管理神機營事務授爲欽差大臣兼命崇厚幫辦都興阿軍務都興阿久歷戎行於管帶馬隊事務尤爲熟悉是以令其前赴直東一帶會同左宗棠李鴻章剿賊期於追剿迅速早行蒞事該大臣務當與左宗棠李鴻章等合力同心妥商籌辦不得稍分畛域崇厚亦當妥籌軍火糧餉接濟都興阿

軍營並將天津防務嚴密布置不得稍形鬆懈左宗棠李鴻章與都興阿同辦一事尤當互相聯絡隨地策應於運河防務固宜盡力布置於會剿事宜亦不可稍涉推諉致懈軍心官文丁寶楨英翰於防剿事宜當隨時與都興阿左宗棠李鴻章合力籌辦不得稍存觀望以期共殄賊氛懋膺上賞將此由六百里各諭令知之

○諭崇厚奏派撥兵勇赴減河下游防守並曾國藩等奏調用閩省輪船赴津各摺片天津減河上游已經左宗棠抽派劉松山郭運昌等營勻紮其下游自吳莊至祁口一帶見經崇厚派令劉景芳余承恩春霖三軍防守並添募勇丁兩營以資厚集所陳於水淺處所遍掘陷坑斲岑子頭高埂並雇雁艇槍勇巡防各節籌辦尙屬妥著卽認真辦理不得有名無實蘇省捕盜輪船不適於用閩省之華福寶輪船見在上海可以移調北來俟駛抵天津

後著崇厚飭令該督帶委員沈應奎等於津門沿海洋面一帶實力巡緝所有軍火糧餉並著妥籌接濟毋令缺乏曾國藩等原片著鈔給閱看將此由五百里諭令知之○調福建輪船巡防天津海口斷捻逆接濟○諭劉坤一等籌解清淮軍餉○壬申諭軍機大臣等文麟景廉奏請簡放都統並委署道缺及吉恆解餉情形阿底爾句逆復仇並文麟奏親督隊伍剿進擊敗安玉竄匪暨請飭伊勒屯等迅解截贖軍餉各摺片烏魯木齊都統統轄各城當此軍務喫緊之時自應派員總統方可呼應靈捷惟文麟等既未能前進而伊勒屯亦有巴里坤應辦事務未便簡派所請著毋庸議其鎮迪道員缺准其卽以黎獻暫署著穆圖善催令出關赴任接辦催運事宜其屯田都司把總並准其以魏忠義徐天智署理主事鍾貴既於人地相宜卽著准其接署主事原缺所有伊勒屯

派往之筆帖式伯恆著卽撤回哈密地方遠聞文麟等擬分兵籌辦尙屬可行著文麟卽行前赴哈密新任景廉暫駐後路以防安敦玉並催運一切所有西路竄賊著文麟等飭令魏忠義確探情形隨時防剿伯克阿底爾先經拏獲何以復被回逆搶回致令糾眾復仇所稱回子小玉素普與郭鳳賢將阿底爾酷刑拷打勒逼謀殺賄縱等情文麟等既經據伯恆所稟咨詢何以伊勒屯等並未具覆卽著伊勒屯何瑄查明阿底爾原案覆奏其伊勒屯等截留餉銀前因巴城待餉孔亟文麟等又無出關消息是以准其提用惟哈密亦屬支絀伊勒屯何瑄遇有餉到卽行撥還嗣後不得再行截留各分畛域致干咎戾並著文麟等迅派妥員前赴山西烏里雅蘇台迎提以濟急需吉恆催餉不力著暫行革職安敦玉一帶物產有限見在文麟各軍籌糧甚艱所有肅州各軍著穆

圖善飭令毋庸前赴關外籌辦糧餉俾文麟等餉糈得以寬爲接濟其沁城一帶能否興辦屯田並著文麟景廉等察度情形妥爲辦理將此由六百里諭知穆圖善文麟景廉伊勒屯並傳諭何琯知之○癸酉諭內閣吏部奏遵議各倉監督並倉場侍郎處分一摺富新倉監督鍾霖等均著照部議革職倉場侍郎鍾岱宋晉總理倉儲職任綦重於各倉虧短米石毫無覺察實屬不能勝任鍾岱著調補泰甯鎮總兵兼總管內務府大臣宋晉著補授內閣學士兼禮部侍郎仍照部議革職畱任鍾岱於天津驗收海運米石完竣後再行赴任宋晉於通州收米事竣再行來京供職○以衍秀爲倉場侍郎由泰甯鎮總兵官遷○調畢道遠爲倉場侍郎以鮑源深爲工部右侍郎由左副都御史遷○是月緩徵江蘇邳州等三州縣被擾新舊額賦

五月丁丑朔諭軍機大臣等劉嶽昭奏行抵曲靖分軍力救省圍兼防東路並請調員差委各摺片滇垣西南北三門均爲迤西賊匪所圍其尋甸之賊與省賊響應窺伺東曲省外之大板橋楊林等處經岑毓英屢挫賊鋒糧道無阻劉嶽昭見抵曲靖擬進攻尋甸早解省圍以保全東路著卽嚴檄全祖凱李家福等相機夾擊先將尋甸一路廓清一面飭令宋延春率在城文武將省防嚴密布置並會同岑毓英妥籌防剿力維全局晉甯一路亦當檄令梁士美等實力進攻以分賊勢據稱移咨四川分撥藥鉛數萬軍火爲進剿急需著崇實迅籌鉛藥數萬斤派員解赴劉嶽昭軍營應用並著源源接濟毋令短絀四川候補道李祐旣據該督奏稱熟悉滇省情形卽著崇實迅飭該員剋期前往交劉嶽昭差委以資得力將此由五百里各諭令知之○戊寅左宗棠奏疊接探報賊

於閏四月十九日由臨邑北竄德平二十日前股向東竄走臣料追軍緊躡賊後計期可抵陵縣甯津一帶賊必東趨樂陵北趨鹽山當卽函商劉松山郭運昌向鹽山橫出截之劉松山等卽於二十二日拔營向東路進發二十三日劉松山於途次得報賊竄山東武定府城西三十餘里之楊家圈八里泡等處卽與郭運昌商赴樂陵北抵樂陵東北十餘里之于家莊訊知賊又竄向海豐縣之東南一帶劉松山慮北面空虛急與郭運昌議北出鹽山截之二十四日馳抵鹽山縣東南八里之劉家莊探得賊在海豐縣之大山一帶距官軍七十里卽於夜深月出時潛師東出行五十餘里抵小山暫憩樹林中適副將譚拔萃覘賊回報賊由東來折向北趨距我軍僅十里劉松山卽分軍由中右兩路郭運昌由左路整隊而進馬隊張兩翼隨之甫行二里許賊瞥見官軍卽停止列

隊官軍三路猛撲賊不能支向南潰竄劉松山郭運昌揮各營壓擊而南追至二十餘里沿途賊屍枕藉官軍方小憩取飲訊據獲賊供稱前面十餘里小港前橫水不過尺劉松山立飭各隊飛奔前進行八九里賊正過港殿後之馬步悍賊忽見追軍又至急列隊回撲維時郭松林潘鼎新陳國瑞等追賊適抵港南已過港之賊復折而北劉松山郭運昌齊隊猛擊賊遂向西奔竄其東面零賊甫過港而北者希圖歸併西向經官軍截擊擒斬略盡各營乘勝追殺二十五里至蘇家集天晚收隊是日疾馳一百三十餘里共斃悍賊五六百名生擒二百餘名是夜賊於鹽山東北虛燒望火以疑我軍而大股於五鼓踰鹽山而西踞城外數里村莊四出掠食劉松山等於三鼓後拔隊由鹽山東北向西急進二十六日天明已抵鹽山城北賊不虞官軍猝至卽紛紛逃竄劉松山郭運

昌分路鈔殺其未及竄出者約二百人圍殺淨盡西面各村踞賊急喊大股回援官軍鏖戰一時許斃賊甚夥乃紛向西南敗竄劉松山郭運昌合隊追殺二十餘里擒斬悍賊甚眾內有賊目唐金生趙春元等數名是日午後復追至樂陵縣之于家莊計且戰且追者又一百三十餘里始行收隊二十七日午刻劉松山郭運昌追至德平屬之孔家鎮各營小憩樹林中忽鎮南騎賊千餘突撲郭運昌隊伍郭運昌嚴陣擊之斃賊亦多比劉松山整隊來援則賊去又遠是日追至德平城西數里之李家樓探賊仍由德平之南竄去查德平之南與商河濟陽緊連西與臨邑陵縣接壤李鴻章前調郭松林潘鼎新兩軍追賊時令張曜宋慶回高唐夏津一帶原以待賊回竄防護運西此次捻眾折向南趨其窺伺運防別覓生路固在意中所幸南路兵力厚集賊雖回竄必不得逞惟北

路兵力本單劉松山郭運昌兩軍連日追逐計程又七百餘里將士未嘗一日休息臣亦未忍再加迫促仍飭該軍畱駐北路以防回竄上諭軍機大臣等此次劉松山等由樂陵急赴鹽山截賊北竄之路辦理尙合機宜賊蹤雖已由德平南竄仍虞伺隙折回左宗棠飭在防各軍嚴密扼守運河天津減河下游著崇厚一體嚴防毋稍疏懈德州至臨清東昌一帶李鴻章當與英翰丁寶楨等督飭各路守軍防剿兼施毋任撲越運河並嚴飭各營認真痛剿不得沾沾以小勝自喜稍涉鬆勁都興阿見已前赴天津著卽齊集馬步各軍趕緊進剿既可杜其回竄兼可追剿迅速並著左宗棠李鴻章丁寶楨英翰各飭所部一面嚴守運河一面與都興阿聯絡聲勢會合夾擊不得因有都興阿進剿遂致互相觀望總期和衷共濟合力同心膚功早奏方爲盡心公事李鶴年所陳張

曜鋒軍在夏津等處獲勝情形尙係十一日以前之事見在賊仍
由北路南竄東昌臨清一帶正須嚴防馬德昭一軍已經李鶴年
派赴東昌著卽飭令該提督會同在防各營認真遏截該撫見帶
四營馳赴大名著與臨清東昌防軍就近策應隨時赴援以固運
防並嚴飭帶隊員弁約束兵丁毋任搔擾地方是爲至要將此由
六百里各諭令知之○諭前因總理各國事務衙門奏查明誤擄
諾海安集延貿易牲畜請飭會辦當經諭令榮全會同李雲麟等
斟酌妥辦茲據榮全奏稱接准棍噶札勒參來咨語多任性礙難
照辦並鈔錄咨文呈覽一摺棍噶札勒參前因迎接索倫等眾路
遇拜精格特哈薩克搶掠牲畜互相接仗雖出一時情急究屬冒
昧自應靜聽榮全等妥善辦理以息爭端該喇嘛負性強驕不知
輕重設竟糾眾肆殺將來辦理諸事窒礙愈多著李雲麟明瑤錫

綸就近善爲開導務須阻止該喇嘛不可因勦洗哈薩克致滋俄
人口實並著榮全隨時咨商辦理榮全摺並咨文各一件均著鈔
給李雲麟等閱看將此由五百里各諭令知之○予貴州陣亡副
將唐立莪等祭葬世職○已卯諭內閣前據曾國藩等奏擬補長
江水師各缺續陳未盡事宜並請以大銜借補小缺各摺片當令
軍機大臣會同該衙門速議具奏茲據奏稱總兵係專闡大員例
應特簡所有岳州鎮總兵等缺應否仍由軍機開單請旨簡放抑
或按照廣西右江鎮雲南普洱鎮之例令該督等另擬正陪請旨
簡放等語長江水師事屬枌始該督等請補各缺自爲因地擇人
起見所有岳州鎮總兵員缺著准其以彭昌禧借補漢陽鎮總兵
員缺著准其以許朝琳補授湖口鎮總兵員缺著准其以丁義方
補授瓜鎮總兵員缺著准其以吳家榜借補嗣後遇有該四鎮

缺出卽由該省督撫保舉堪勝總兵人員擬定正陪請旨簡放其請補副將以下新設各缺著照所議准其以周國興等行借補至未盡事宜十條及大銜借補小缺章程均著照所議辦理長江水師所轄江面延袤五千餘里職任所關甚重該督撫等務當會同該水師提督隨時實力整頓期於經久無弊毋任漸形懈弛以重營務而固江防○庚辰李鴻章奏據張曜宋慶稟稱拏獲賊匪楊見山供稱跟隨逆首僞淮王邱遠才多年閏四月十八日夜官軍攻破邱遠才住處邱逆不及騎馬帶同伊等逃跑甫出莊外半里槍斃之下忽見邱遠才受傷倒地伊躲入路傍小廟復見官軍二人過去用矛連扎諒已身死等語查邱遠才係粵逆餘黨與賴汶洸同入捻夥張總愚與之狼狽爲奸實爲賊中巨擘若果伏誅足孤張逆之黨俟確查再行具奏郭松林潘鼎新與陳國瑞合軍

進剿於二十四日追抵陽信縣城二十餘里卽遇賊隊該逆不敢接仗直由海豐竄向東北二十五日潘鼎新郭松林追出西北之大柏山以攔截之劉松山郭運昌亦各帶隊由南皮鹽山迎剿行抵小山地方適遇賊由東向北劉松山等分路進鈔賊聞官軍在北相率停住列隊劉松山郭運昌乘勢猛撲賊紛紛潰走追四五里張逆復糾眾回拒我軍酣戰半時斃賊甚夥賊仍向南敗竄前面隔一小河賊已撲過郭松林潘鼎新大隊適至善慶溫德勒克西唐仁廉等馬隊分列兩翼蟬聯而進該逆抵敵不住越河遁去郭松林等由後追殺二三十里斃賊二百餘名劉松山郭運昌復由北面衝擊賊遂折向西奔我軍乘勝追殺又斃賊數百名追至鹽山城外賊向西南狂奔陳國瑞追過樂陵二十七日及賊接仗殺斃百餘名二十八日各軍會追至臨邑城南賊由禹城向西南

一帶奔亡。旣軍程文炳牛師韓於二十七日繞出平原縣南遇賊騎回竄當卽督隊迎剿賊又向南敗走查賊情窮蹙之餘極爲狡猾恃其多騎善走避兵疾驅徒疲我師難得痛戰實深憤急據陳國瑞函稱該逆欲由茌平清平直撲臨清圖渡運河該侍衛已帶隊由平原赴高唐相機迎擊。臣又飛飭張曜宋慶由恩縣北往夏津一帶攔剿郭松林潘鼎新等由禹城一帶兜進冀收夾擊之效。上諭軍機大臣等此次擒逆乘虛北竄經劉松山等迎擊後經郭松林陳國瑞等追擊該逆敗後仍向東南回竄據陳國瑞稟報該逆欲撲臨清渡運其計甚爲狡詐著李鴻章卽飭該侍衛會合各軍奮力追剿毋令得以竄逸英翰近在臨清丁寶楨亦相距非遙並著督飭各軍嚴密防剿毋令一人一騎得竄運西致干重咎。陳國瑞自春間帶隊以來未見奮勉出力此次由豫赴東雖經屢

次接仗亦僅截殺尾賊未能痛加勦洗遠不及昔年山東勦賊之時著都興阿李鴻章傳諭該侍衛會合諸將領同心協力迅殄逆氛張曜宋慶郭松林潘鼎新等亦係帶隊大員務當忠誠共矢不遺餘力毋得稍有推諉觀望本日李鴻章奏劉銘傳所部勦捻出力各員獎勵一摺劉銘傳向來卓著戰功特沛恩施降旨允准該提督當亦倍加感奮著李鴻章傳諭劉銘傳迅赴前敵督隊勦賊以仰副朝廷終始成全之意捻逆被勦既急難保不復圖北竄並著左宗棠崇厚嚴扼運減各河遇賊卽擊毋得鬆勁都興阿抵津後卽著會商左宗棠等檄飭各軍兜勦迅奏膚功以慰懸盼將此由六百里各諭令知之○諭鄭敦謹奏遵撥官兵增防河保以北相機迎剿一摺陝省神木等處回匪竄入準噶爾旗一帶該署撫見派河保舊駐大同鎮兵一千名沿河北上與前撥選之存城官

兵等擇要駐紮卽旨鄭敦謹督飭馬陞統率所部規賊所向認真截擊一面將船隻提歸東岸毋令該逆偷渡河保偏關一帶與陝省神木府谷等邑僅隔一河該署撫仍當督飭防軍嚴密守禦不可稍涉疏虞薩達托等廳防務著卽檄飭道員恆祐會商歸綏道興奎等將稽查奸宄弭匪徒各事宜實心辦理毋得虛應故事所有防剿機宜鄭敦謹當與德勒克多爾濟杜嘎爾等悉心籌商妥爲調度以期迅殄逆氛該署撫見駐澤州距省北較遠應如何兼顧之處並著統籌全局相機辦理將此由五百里諭令知之○辛巳諭軍機大臣等庫克吉泰等奏遵覆籌兵會剿及土匪悔罪投誠並飭劉厚基等派兵會剿穆圖善奏北路剿匪情形並河州回匪畏懼乞降各摺片榆林境屬回匪旣經庫克吉泰等抽兵會剿卽著飭令前敵各軍迅速痛剿盡殲醜類胡世英畱駐延安之

兩營並著金順飭令歸併進剿以厚兵力土匪董幅祥是否真心投誠該將軍等自能酌度卽著會商金順妥爲辦理不可墮其詭謀致貽後悔其收撫之後著金順嚴禁兵勇攫取財物俾得資生以免反側北路定靖一帶回逆竄陷梁鎮擾及甯條梁復有回竄之信又有土匪乘間竊發亟宜保護甯條梁要地以免肆擾著金順督率胡世英等軍相機堵剿毋令該逆得以逞志第聞胡世英從前頗知奮勉近來漸形驕縱其原帶各營已不能精選以致多有家室不守紀律未便再令管帶程興烈舊部著穆圖善另派妥員接管並著該署督會同金順檄飭胡世英裁汰老弱嚴加鈐束毋任兵勇肆意妄爲以歸實用河州東南鄉回匪畏懾兵威懇請乞降其中誠僞朝廷無從遙測該署督旣稱馬占鰲所稟尙非虛語卽著相機妥辦收繳器械馬匹補納錢糧並興辦布種以濟軍

食其彭忠國等軍並著飭令嚴密扼堵毋任竄逸所有隆靜土匪
卽著飭令陳德隆等會勦該署督斷不可因河州遠已撫稍涉
大意致滋貽誤將此由六百里各諭令知之○以四川官軍攻克
貴州偏刀水賊巢賞知府唐炯道銜○予甘肅陣亡副都統敦奇
祥阿等祭葬世職○癸未諭軍機大臣等丁寶楨奏官軍追剿情
形一摺捻逆由武定鹽山竄至德平臨邑境內連夜奔馳圖撲河
牆經郭松林潘鼎新王心安等各率所部追至荏平甫經接仗賊
卽敗潰折向東趨該逆肆意奔突遇兵卽遁官軍追逐多日並未
能獲一大戰痛加殲戮似此日事尾追疲於奔命於事何濟都興
阿見已馳抵津郡著卽前赴直東交界處所探賊所向四面布置
統率馬部各隊實力夾擊使該逆不得任意奔竄以期一鼓殲除
並著左宗棠李鴻章各飭所部節節進紮與追剿之師聯絡援應

俾該逆到處阻截爲以逸待勞之計庶辦理較爲得力天津減河一帶崇厚當嚴加防範以備該逆回竄直東沿運河牆均經築就李鴻章左宗棠丁寶楨英翰均當督飭防軍嚴密遏守不可稍形疏懈致逆蹤竄越河西是爲至要將此由六百里各諭令知之○諭庫克吉泰劉典奏擊退西路賊匪撥兵防剿西北並榆林等處被擾情形各摺片陝省西路鳳翔各屬被大股甘回竄擾經李輝武督率川軍在寶雞所屬之虢縣鎮底店斜坡等處疊擊獲勝殲斃僞帥馬姓賊目趙姓並擊敗杜家莊等處股匪斃賊甚多其由扶風橫竄乾州之賊亦經常興阿等擊退敗竄岐山由鳳翔麟遊分路遁回甘境該逆竄鳳未遂復由邠長三水內竄中部經周紹濂督兵力戰疊獲大勝殲斃僞帥曹姓惟周紹濂所部兵力較單該逆見已分股由中部繞至洛川白水及宜君馬關鎮等處邵陽

澄城均有賊蹤勢甚蔓延劉典見已調派各營馳赴亡水等縣剿辦著卽嚴檄諸軍分路痛擊速行殄滅毋任擾至沿河一帶震及晉疆北山土回各匪竄撲榆林各屬兵團失利神木失陷該逆分股竄往草地勢熾頗張庫克吉泰劉典務當檄調得力之軍迅速馳往剿辦並飛咨金順迅率所部會合延綏鎮總兵盡力剿除不得以去省較遠稍形懈弛三水邠州長武各隘並著庫克吉泰等派兵防守以杜該逆續行東竄昨據御史郭從矩奏請飭陝甘等省修築堡寨堅壁清野一摺所陳事宜三條於陝省情形有無可採著庫克吉泰劉典酌籌舉行郭從矩原摺著鈔給閱看將此由六百里各諭令知之○予陝西陣亡參將慶廉祭葬世職○甲申諭軍機大臣等鄭敦謹奏遵旨移防北路並請將知府等員開復頂帶各摺片陝回竄近準噶爾旗界晉省河保各邑及薩清托等

城情形喫重其潞澤一帶防務較鬆自應移緩就急力固省北鄭
敦謹以甯武地處適中見擬由澤州啟程前往駐紮著卽懷遵疊
次諭旨迅將河保等處防務妥爲布置一面飛咨總兵馬陞統率
所部探明何處有警卽向何處截擊一面嚴檄郭得勝管帶忠字
舊營與原駐河保之忠字新營各勇丁會合扼守毋稍鬆勁在省
之撫標官兵並著抽出精壯數百名以資策應其攔車鎮大河口
東陽關各隘該署撫仍當飭令陳膺福崇安等加意嚴防不准虛
應故事知府陳膺福參將趙融旣據查明無縱容勇丁情事其巡
查口隘亦尙勤奮陳膺福趙融均著賞還頂帶仍飭帶隊以觀後
效前據郭從矩奏請飭山西等省修築堡寨堅壁清野一摺所陳
事宜三條於晉省情形有無可採著該署撫相度機宜飭屬斟酌
辦理毋徒擾民爲要郭從矩原摺著鈔給閱看將此立五百里諭

令知之○乙酉諭軍機大臣等都興阿等奏會籌進剿情形一摺都興阿已抵津門見於津防洋槍礮隊內撥兵一千二百餘名派王佐臣統領前赴減河駐紮見在運河以西有左宗棠各營防守李鴻章所部由德州一路進剿西南兩面布置既嚴自宜由北路進兵以爲夾攻之計著都興阿馳赴減河擇要扼紮督率各軍相機前進會同左宗棠李鴻章廣籌方略安速剿辦爲一鼓聚殲之計達明阿所帶之精字威遠隊八百名著都興阿崇厚咨照恩承飭令該章京統率所部迅赴都興阿軍營以資厚集其吉林黑龍江馬隊官兵都興阿於到防後務擇其技藝嫻熟馬匹臚壯者飭令過河協剿迅殄逆氛將此由六百里各諭令知之○諭伊勒屯等奏請飭諭烏科二城捐輸軍餉奎昌奏據聞布倫托海有營派兵確探各摺巴城累年領到軍餉不敷支發該處兵丁枵腹荷戈

自應設法接濟烏科兩城尙稱完善著麟興榮全錦丕勒多爾濟
奎昌福濟車林多爾濟於該兩城官商及蒙古人等妥爲勸諭如
有力能助餉踴躍輸將者准其給予議敘一俟捐有成數卽解至
巴城以濟軍食惟不得抑勒苛派致滋擾累奎昌奏蒙兵混布報
稱聞布淪托海於四月二十六日夜間有難民變亂情事致附近
蒙古各站人心驚惶驛路梗塞該處距布倫托海尙遠傳聞是否
確實著奎昌等卽派員繞道前往探明確耗隨時具奏布倫托海
新城關緊要如有難民擾害亟應設法布置李雲麟何以尙未
入奏著一面據實奏聞一面嚴飭該城員弁彈壓撫綏以靖邊圉
將此由五百里諭知麟興榮全錦丕勒多爾濟奎昌福濟車林多
爾濟李雲麟明瑤錫綸伊勒屯並傳諭何瑄知之○丁亥諭軍機
大臣等都興阿崇厚奏捻逆勢向北趨擬赴前敵布置一摺捻逆

由臨邑敗潰狂奔有北趨之信都興阿見已親督洋槍礮隊全軍並調達明阿所帶威遠隊及吉林黑龍江馬隊徑赴減河一帶查閱布置著卽實心經理相機迎剿恩承見赴青縣著都興阿就近與該侍郎妥商斟酌抽調總須後路防兵足數分布方可抽撥前進不可使後路空虛致賊乘隙渡河又形滋蔓張曜宋慶春壽陳國瑞四軍旣在德州獲勝卽係剿賊喫緊之時該將軍職任督剿正當親赴前敵督帶各軍合力進剿何得以張曜等四軍仍請歸李鴻章調遣似此迹涉推諉大負朝廷委任之意著都興阿於到減河後查閱事竣迅速前進探明張曜等軍進兵處所就近督率迎剿以殄逆氛減河防守事宜著崇厚嚴密布置毋稍疏漏並將軍火糧餉隨時接濟都興阿軍營毋任缺乏將此由六百里各諭令知之○諭明瑤等奏布倫托海兵民啟釁一摺據稱四月間布

倫托海兵民因風聞李雲麟有洗滅兵民之意眾心驚惶由此起
事搶去軍械並庫存茶布等項傷斃官兵等語該城設立未久一
切安插事宜責成李雲麟等辦理何以倉卒之間忽生變亂李雲
麟何以不亟籌彈壓藉安設臺站爲詞率往青格里一帶難保非
有心規避其該兵民按出摺彙是否係李雲麟所擬之件著卽明
白回奏聽候諭旨並迅回布倫托海會同明瑤等妥籌彈壓以靖
地方福濟計已將抵科城錫倫係布倫托海幫辦大員見在行抵
何處諒距該城不遠著該大臣等趕緊會同前往查辦將起釁情
形據實奏聞毋稍徇隱該處突起釁端顯係有奸人從中煽惑藉
端生事未必兵民盡萌叛志但人數眾多亟宜妥籌綏輯以靖亂
階明瑤豈可前往科城置本任於不顧棍噶札勒參平日辦事實
心見值該處有事之秋正當竭力圖維以副委任豈可遽萌退志

著明瑤棍噶札勒參先將附從人眾曉諭解散其爲首倡亂者諒亦不過數人卽著設法拏辦以儆刁頑務使該兵民喇嘛等盡釋疑慮各安生業是爲至要明瑤等另二件著鈔給福濟錫綸閱看軍機處呈遞明瑤等咨到文彙等二件著一併發給閱看將此由六百里諭知福濟李雲麟明瑤錫綸並傳諭棍噶札勒參知之○戊子諭軍機大臣等劉岷奏援黔官軍攻克偏刀水賊巢肅清河西並疊克苗寨及剿撫後山各室崗情形一摺貴州偏刀水地方經李元度等會合川軍攻克賊巢擒斬首逆各情業據崇實奏報楚軍攻剿黔省教匪疊獲勝捷實素漸可肅清惟教中頭目尙有劉儀順一犯至今未獲是否乘閒潛逃仍著飭令李元度切實查明稟報毋稍含混老圍巖柯素家寨等處卽著嚴檄彭芝亮督率所部擇要駐紮如該提督不甚得力該撫務選結實可靠之員前

往管帶以資鎮撫李元度既屬患病著實假兩箇月一俟病痊卽赴雲南臬司新任其遣撤兵勇並著傳知該臬司挑選精壯帶赴雲南隨同剿賊貴東一帶地方甫致安靖所有善後事宜曾璧光務當嚴飭貴東道督率各該地方官妥籌撫輯毋致再生事端將此由五百里各諭令知之○庚寅諭軍機大臣等李鶴年奏剿辦泌陽匪徒淨盡並遊擊被戕各摺片河南泌陽匪徒滋事擾及裕州經該地方官激勵兵勇會同泌陽民團將分股匪徒斬殺殆盡復經李鶴年派往之總兵崔廷桂督帶官兵聯絡各處鄉團與總兵趙鴻舉將泌陽唐縣等處股匪殲除淨盡並將首匪張十一及兇悍夥犯任禿子擒獲辦一尙爲迅速所有在事出力之員弁紳團准李鶴年擇尤存記彙案保獎在逃之首犯花得春著飭令崔廷桂等嚴督兵練設法搜捕務期弋獲毋任漏網至候補遊擊張

鏞經李鶴年派往德州一帶設撥馳送文報行至山東夏津縣之蘆里莊被民團多人戕害並將同行之豫省遊擊周明崐砍傷張鏞所帶弁兵及馬夫人等十二名均無下落近來各處民團强悍恃眾戕官之案不一而足其風斷不可長著丁寶楨認真辦務將此案首從各犯嚴拏懲辦以儆兇頑其無下落之弁兵等是否全行被害一併查明具奏東省民團並著丁寶楨揀派妥員會同該地方官妥爲經理並剴切曉諭毋得仍蹈故習以消隱患李鶴年原片著鈔給閱看將此由五百里各諭令知之○諭林壽圖奏平涼失陷遊擊李承萬遇害知縣陳日新並未殉難據稟出城彈壓且千總張維有通匪情事又風聞陳日新與張維私分餉銀與之齟齬等語棄城通賊罪名均重著實均應徹底根究以肅紀綱著穆圖善按照林壽圖所陳情節遴委妥員確切查明嚴參懲辦

遇害遊擊李承萬著穆圖善查明請卹林壽圖片著鈔給閱看將
此諭令知之○予山東被戕遊擊張鏞祭葬世職○壬辰諭軍機
大臣等郭柏蔭等奏遣撤霆峻各營並辦理江湖會匪情形一摺
江湖會匪匪首蕭潮翥卽蕭潮舉在湖北地方立有蓬萊天台等
山老帽陪堂紅旗等項名目沿江肆掠乘霆峻等營遣撤糾黨分
布黃梅武穴龍坪各水次阻截散勇迫脅滋事兇燄甚熾經郭柏
蔭等檄飭提督譚仁芳等水陸各營拏獲匪黨劉子霖胡國星等
十餘名正法並盤獲匪船三隻其盤踞黃梅陸家背之匪亦經總
兵婁雲慶密約水師會同民練殲斃四五百人餘匪星散匪首蕭
潮翥經知縣廖恩樹副將向百福會合兵勇追捕經勇丁陳之貞
等將蕭潮翥殺斃辦理甚爲妥速著郭柏蔭何璟嚴飭所屬各地
方官聯絡水陸各營將逃散餘匪一體認真兜拏務期淨絕根株

母任一名漏網霆峻各營散勇並著飭令婁雲慶妥爲鈴束毋令沿途逗留滋事所調各營仍令擇要駐紮嚴密接捕以靖地方將此諭知郭柏蔭並傳諭何璟知之○諭庫克吉泰劉典奏北山賊匪充斥官軍力戰受挫甘肅賊竄陝境見籌防剿情形並賊擾府谷及進剿汧陽獲勝撥營前赴邠州各摺片逆首楊汶志突撲延安副將劉文華等馳往堵禦力戰陣亡劉厚基帶隊赴援槍斃餘賊無算並將延安城防妥爲布置賊始不敢攻撲劉厚基一軍此次因賊眾失利膚施宜川延長等處匪勢騷張晉省吉州一帶與延宜僅隔一河尤虞賊蹤東越該將軍等請飭鄭敦謹派兵渡河與陝軍夾擊著卽檄令劉厚基劉端冕各率所部分投追剿鄭敦謹計已馳抵甯武著卽相度機宜將本境河防布置周密如可分兵渡河卽飭陳湜督率防河之軍由吉州過河以期東西合擊痛

埽賊氛甘省回逆各匪乘陝境麥熟分途竄擾雖經高連陞周紹
濂等軍截擊獲勝而汧隴邠長沿邊地方麥收較遲該逆尙思掠
食著庫克吉泰劉典檄令吳士邁黃鼎等聯絡各軍併力嚴扼不
可稍涉疏虞榆林東路回逆由神木竄撲府谷縣境擾及木瓜清
水等堡遊擊榮光等先期逃避實屬恇怯無能黃甫營遊擊榮光
清水營把總康濟均著卽行革職拏問交庫克吉泰等提省審訊
按律懲辦府谷城與保德州城相距甚近山西防務尤未可鬆如
府谷附近有害卽著鄭敦謹飭令防守河保各軍渡河援應並著
添派勁旅嚴防河保一帶毋得稍涉大意李輝武等軍在汧陽一
帶大獲勝仗汧鳳境內見無賊蹤惟邠州西北原上賊股麕聚自
應迅圖撲滅著庫克吉泰劉典嚴檄劉倬雲喻兆圭等分路前進
與黃鼎一軍相機夾擊毋任四出蔓延將此由六百里各諭令知

之○諭崇寶奏官軍進剿越窩夷匪疊獲勝仗並見在籌辦情形一摺四川越窩夷匪恃其地險巢深叛服無常久爲建南之患本年春間滇匪窺伺蜀邊句結冕越夷匪該署督以越窩爲省垣西南門戶尤關緊要派提督周達武等於四月間督兵進剿乘勝攻破賊卡兩座近徧普雄勦撫兼施辦理尙爲得手惟該匪負隅抗拒督不畏死目下阿彌羅尖角垵兩卡雖已攻破而普雄爲猓夷藏匿淵藪該處山川險阻尤宜嚴飭將士相度形勢穩慎進攻儻能拔其巢穴庶邊界地方可期一勞永逸著崇寶檄令周達武等力圖進取如該夷悔罪投誠亦不妨分別辦理所有此次出力人員著准其擇尤保奏毋許冒濫傷亡弁勇並著查明請卹將此由六百里諭令知之○予甘肅陣亡副將劉文華等祭葬世職○癸巳李鴻章奏臣前飭郭松林潘鼎新等暫紮陵縣臨邑一帶適中

之地伺賊竄近邀擊以逸待勞張曜宋慶駐軍恩縣夏津屏蔽西北運防休養旬日令卽趕緊拔赴東路輪替追剿五月初七八等日賊由武定陽信海豐等處北趨劉松山郭運昌喜昌馬步各軍由東光向鹽山進剿張曜宋慶由樂陵馳向正北春壽統所部馬隊由樂陵向東北前進十二日午後張曜宋慶行抵鹽山之盤村適該匪在村莊休息宋慶張曜分左右兩路捲旗疾進逆眾登時驚亂擊斃悍賊甚多該逆且拒且走兩軍奮勇盪決匪勢不支向西南狂奔我軍緊追三十餘里天氣炎熱人馬困極始行停歇計生擒賊目李幼瞬韓耿二名長髮老捻一百三十餘名劉松山等聞亦於是日剿賊獲勝尙未報到該逆徑向西南敗竄張曜等恐其窺伺運河十三日會同劉松山緊躡攔剿臣探聞甯津已有賊蹤飛飭提督吳長慶由桑園帶隊赴吳橋攔截郭松林由陵縣派

馬步向東兜擊該逆知西路有兵復向正南偏東往德平竄去是晚突至臨邑城東北十餘里各村踞宿潘鼎新適駐臨邑急令步隊乘夜襲之突入賊巢擒斬甚夥據獲賊供稱張宗先一股殲除殆盡十四日潘鼎新仍出隊跟剿計可與張曜宋慶等會合商辦查該逆窮窘之餘尤極剽猾運東地勢平曠縱橫七八百里晝夜追奔徒疲士卒尙難制賊死命且久晴之後運河日涸西岸民團協守未可深恃處處皆有鋌走之虞臣愚以爲宜乘黃河伏汎盛漲時縮地圍紮以運河爲外圍而就恩縣夏津高唐之馬頰河截長補短爲裏圍偪賊西南層層布置占地較狹困賊較易收功或可較速臣已商同丁寶楨檄飭恩夏清平各屬官紳號召民團就馬頰河南岸聯築卡牆分派員弁前往督催日來漸次興築但未卜何時竣工又飭郭松林潘鼎新周盛波各督弁勇由臨邑陵縣

接築牆濠與馬頰河民圩銜接俟將來追賊過濟陽各軍合力圍
築直至黃河北岸先困賊於西南一隅再行分隊輪替逐戰庶賊
騎有所限制而剿辦稍有把握又奏據潘鼎新馳報五月十四日
會同副都統善慶溫德勒克西乘勝兜剿在臨邑東三十里地方
截殺斃賊甚多該逆向南竄去是日傍晚張曜宋慶亦督軍追至
該藩司會商張曜等請由臨邑而南接連排紮先拒北竄之路再
該輪替進擊張曜等以平地紮牆兵力不敷爲慮臣飭其相機妥
辦或俟他軍追賊過臨會商協助又據張曜等稟稱獲賊僉供逆
首張總愚因無路求生東北軍勢過盛欲糾死黨由臨清以北故
城以南乘虛窺渡運河請飭東皖各軍就近迎擊各情臣查逆勢
先趨東北各軍不得不往北面布置茲漸偪回西南又不得不就
地圍紮冀扼北竄而制奔突雖兵力未齊而機勢可圖臣惟督同

諸將竭力籌辦不敢豫料必有成局查夏津清平高唐一帶實爲西北運河屏蔽見在馬頰河北岸鄉團次第興築長牆一時尙難竣事臣已臧商英翰請將新到皖軍張得勝漕軍張從龍等酌派兩枝就近赴馬頰河南岸清平高唐一帶擇要扼剿遮護西北運防並咨商丁寶楨嚴飭馬頰河沿岸州縣趕緊集團勒限蔽工以爲運東屏蔽實於大局有神應懇 聖恩飭下該撫臣等合力籌維勿稍遲誤 上諭軍機大臣等捻逆北竄後經張曜等督軍追剿該逆敗遁南竄臨邑復經潘鼎新等擊敗李鴻章擬趁黃河伏汛縮地圍紮就馬頰河截長補短偪賊西南層層布置庶該逆無可紛竄殄滅更有把握卽著李鴻章督飭郭松林等由臨邑陵縣接築牆濠與馬頰河民圩接續並著英翰將新到之張得勝張從龍兩軍酌派赴馬頰南岸清平高唐一帶扼剿丁寶楨身任地方

卽著嚴飭馬頰河沿岸州縣趕緊集團勒限藏工見在機勢可圖
總宜剋期辦竣以速爲要若日久爲逆匪窺破必不肯就我範圍
左宗棠李鴻章英翰丁寶楨務當協力同心不得稍存歧視都興
阿卽著懷遵前旨迅由北路進剿會合諸軍一鼓殲除不得以慎
重爲辭致失機宜該將軍營所需軍火糧餉著崇厚妥爲護送該
大臣等均爲朝廷倚賴之人當此天氣炎熱兵將疲困而宵旰焦
勞不遑寢食如再遷延各存怠見不能迅奏膚功其何以上對朝
廷下慰將士以拯生民於水火耶勉之慎之將此由六百里各諭
令知之○甲午左宗棠奏前月抄劉松山等軍擊賊獲勝各軍收
隊回運東原防藉資休息甫數日賊復由東昌回竄武定一帶騎
賊已近海豐劉松山卽於五月初九日率馬步各營與郭運昌及
喜昌等所部向鹽山橫出截之初十日行至鹽山縣西南訥知賊

騎已竄至縣東南一帶遂折向正北冀繞越賊前爲攔頭之師是日行一百二十里抵鹽山城北李家莊聞賊已竄至鹽山東及東北游家莊程村一帶盤踞劉松山令軍士暫憩三鼓銜枚疾走繞由賊北壓剿而南行五十二里直偪游家莊程村天尚未曙分步軍爲四路居中馬隊張兩翼隨之賊偵官軍三面掩至倉卒列隊抗拒官軍急起擊之擒斬甚夥賊向東南敗竄官軍追至海豐縣屬之新集前阻一溝賊乃折向東北而走劉松山等以尾追徒勞仍向正北截之行三十餘里至海豐縣屬之小山賊見官軍復阻其前乃折趨西南官軍躡之僅擒斬尾賊百餘忽大雨如注暫息片時午後雨止整隊急進行十餘里至鹽山屬之丁村賊方避雨散踞各村掠食意官軍已追一晝夜必不卽至無不拋械而嬉官軍乘其不備分路衝殺截賊隊爲數段羣賊各跨馬覓路奔逃約分

三起一向西南一向正南一向東南計自初十夜至十一日追剿角逐一百四十餘里約其斃悍擒五六百名生擒逆目李生新及長髮賊百八十餘名拔出難民無數是夜有騎賊赴營投誠供張總愚以官軍太偏減運兩河不可竄越喉諸賊明早向南逃走別覓生路劉松山郭運昌傳令各營就近加薪舉火示賊以形二鼓後潛向鹽山南路橫擊十二日天明抵滄州屬之張三村適與賊遇賊以騎賊抗追師而令步賊急由南路竄遁劉松山郭運昌督各營開放槍礮傷斃賊騎甚多截賊隊爲二左路之賊徑向南奔右路之賊不能合併遂向西奔復折而南官軍分追二十餘里抵滄州屬之宋村沿途又擒斬悍賊一二百名午刻馳抵南皮縣境偵知賊之由張三村南竄者行抵鹽山縣盤村適遇張曜宋慶南來迎頭截殺賊又大敗生擒賊目李幼麟韓耿及擒黨一百二十

餘名拔出難民七百餘人斬獲無算其右路之賊由南皮東光邊境竄逸者申初竄至黎家集距連鎮僅二十里臣方派隊截剿旋探賊已向甯津竄去追之不及酉刻竄甯津城北繞東南急馳戌刻已至柴胡店蓋一日已疾馳二百餘里矣十三日劉松山等向西南行十餘里與張曜宋慶合隊前進賊已由德平竄去察看賊蹤似將由陵縣臨邑一帶南趨張曜宋慶已由德平躡蹤而南南路兵力厚集可收夾擊之效李鴻章前飭各軍於德州陵縣濟陽一帶掘濠築牆擬偪賊一隅爲聚殲之計工程亦可次第告成臣見飭劉松山等馬步各軍勒兵甯津以待上諭軍機大臣等劉松山郭運昌喜昌等軍追賊至鹽山海豐滄州等處疊獲勝仗擒斬甚夥該逆分起逃竄復經官軍追殺均向德平南趨昨據李鴻章奏稱擬就馬頰河沿岸築牆並於臨邑陵縣等處築它牆濠與

馬頰河民圩接續茲據左宗棠奏稱李鴻章在德州陵縣濟陽掘濠築牆與李鴻章昨奏大略相同左宗棠當督飭諸軍迎頭截擊以固裏圍濠牆一面仍將沿運河牆聯絡民團兵勇嚴密扼守並知會李鴻章丁寶楨英翰一體兼防運河岸牆不可稍有疏虞。令賊蹤竄越甯津一帶防剿事宜並著左宗棠督飭劉松山等軍妥籌兼顧將此由六百里諭令知之○丙申諭軍機大臣等都興阿奏馳赴青縣察看減河擬籌布置情形一摺據減河水勢並不寬深自捷地至呂家橋雖築有橫牆而迤北之運河西岸毫無防範京旗各營相距太遠擬將靜海等處鄉團調歸本處扼要之地多紮官兵等語所奏不爲無見南路李鴻章等軍追剿既急兵勢甚盛該逆冒險北竄圖越減河實在意計之中第南路鄉團既調回青滄等處則自吳橋以北上溯南皮運河西岸左宗棠之軍能

否足敷防守不可不通盤籌畫萬一該逆從東光等處乘虛西竄則南北各軍俱落賊後辦理更無把握著都興阿會商崇厚恩承應否將京兵調紮獨流等鎮之處妥籌布置並咨商左宗棠能否堵扼不使逆匪得以橫竄再行將鄉團調回以扼北路都興阿見已行抵青縣兵力尙單卽著迅速前進檄催春壽宋慶張曜陳國瑞各軍會合妥爲調度俾得與李鴻章之軍南北聲勢聯絡遇賊卽擊迅奏膚功用副殷盼將此由六百里各諭令知之○已亥諭軍機大臣等鄭敦謹奏擊退撲河竄匪並進兵驟難渡河情形各摺片陝省府谷賊匪經蒙古官兵會合該處民團擊退竄往葭州米脂一帶神木府谷境內一律肅清惟該逆蹤迹飄忽難保不去而復來鄭敦謹當飭晉省北路防兵隨時嚴防不可稍涉鬆懈葭州與晉省興臨等縣亦係毗連並著庫克吉泰劉典將竄往葭州

米脂之賊派兵迅速剿除毋任再行肆竄至邵陽韓城賊匪竄偏
河千疊經晉省西路防軍擊退防堵尙屬認真鄭敦謹見住省城
居中調度卽著嚴飭陳湜親督各營將士並各地方官於蒲絳吉
鄉等處聯絡堵禦並將沿河渡船提歸東岸不可稍涉大意庫克
吉泰劉典尤當督飭陝軍將韓城邵陽等處賊匪力籌剿洗不得
任聽賊蹤竄及晉疆致干咎戾晉省西路沿河地段綿長鄭敦謹
以兵力較單難於抽調防兵過河進剿致本境轉形空虛亦係實
在情形庫克吉泰劉典惟應就陝省見有兵力將北山賊匪迅圖
殲滅不得專待鄰省會剿致涉延誤至府谷與保德僅隔一河地
勢較近儻遇該處有警鄭敦謹仍當酌量派兵渡河援應以固疆
圉將此由六百里各諭令知之○庚子諭內閣成祿奏官軍剿賊
疊勝收復各處屯莊並總兵營勇潰變請旨懲辦一摺甘肅肅州

踞逆因黨與漸散潛於肅高兩屬各處勾煽以致逆匪同時蠢動經該提督派總兵馬天祥等統軍由營兒垵進攻連戰皆捷先後殲斃逆回三四百名奸匪千餘名自營兒垵以及石灰窯東洞子金佛寺等處各屯莊全行收復我軍進紮上下河清一帶軍威大振高屬之紅崖子等處從逆各屯莊亦望風反正勦辦甫經得手詎總兵王仁和一軍斗因糧絀變潰各營繼起眾心驚惶旋經健銳鎮西兩軍多方拊循始得相安無事該總兵等統率無方自應嚴行懲辦以肅軍律署肅州鎮總兵王仁和著卽行革職仍畱署任責令帶營立功贖罪如再不知奮勉卽著從嚴參辦已革遊擊王禮和著發往新疆效力贖罪遊擊石子成守備潘禹久剋扣軍糧以致眾心潰變實屬大干軍律均著在軍前正法以昭炯戒○諭軍機大臣等英翰奏皖軍在武定期捻獲勝牛師韓爲民圩誤

傷調營養息並飭張得勝等合隊前進一摺捻逆竄向武定經牛師韓督軍追剿設計誘賊得獲大勝追至雷化距賊甚近乃牛師韓爲民圩排槍擊傷以致不能前進機會甚屬可惜卽著英翰派員迎調牛師韓前赴臨清趕緊延醫調治以期速痊雷化所屬李家民圩既經該總兵告知勿須驚懼何以驟放排槍致牛師韓身受多傷隨從員弁亦傷至三十餘人是否該弁兵等先有搔擾情事抑係該民圩恃眾傷官並著丁寶楨確切查明嚴行懲辦前據李鴻章奏擬於馬頰河添築壕牆以扼賊竄曾諭英翰派張得勝等軍前往協防見在該署撫已派該提督會同程文炳合隊前進卽著英翰飭令張得勝等協同防守如遇賊竄近卽行迎剿俾壕牆得以速竣而滅賊較有把握諒該署撫必能與李鴻章妥商籌辦也將此由六百里各諭令知之○諭庫克吉泰等奏回逆竄擾

邠長甘省靈臺境內擊賊獲勝請飭晉兵渡河夾擊並請將知府成定康畱於陝西各摺片長武三水等處經閩定邦等分路進剿疊獲勝捷該逆見由邠州折竄庫克吉泰等檄道員黃鼎迅赴長武會剿卽著該將軍等催令該道員星速前進會同閩定邦等視賊所向迅殄逆氛甘肅回目馬豔魁等竄踞靈臺擾及麟遊經吳士邁等進剿大獲勝仗卽著庫克吉泰等嚴檄官軍乘勝埽蕩悉數殲除毋畱遺孽晉省西路沿河地段綿長昨據鄭敦謹奏稱兵力甚單未能抽調防兵過河進剿自係實在情形著庫克吉泰劉典懷遵昨日諭旨就陝省見有兵力分路布置將匪股次第撲滅以期漸就廓清候選知府成定康著准其畱於陝西以知府歸候補班用該將軍等擬令該員募勇千五百人進駐綏德並署綏德州知州事務均著照所擬辦理庫克吉泰等當飭令成定康將安

民勦匪事宜實心辦理毋得有名無實將此由六百里各諭令知之○諭成祿奏官軍勦匪情形並商同楊占鼐先顧肅軍前敵大局再行部署出關暨籌辦潰勇各摺片官軍進攻肅州連獲大捷克復屯莊多處而王仁和所統仁字一軍因餉匱變亂以致前敵各軍眾心惶惑全行掣動著穆圖善傳諭楊占鼐一面督軍進攻肅城一面將金塔毛目一帶潰勇或勦或撫相機妥辦此起潰勇將來即使收撫回營已成無紀之師並著該署督飭令楊占鼐加意拊循仍須實力整頓並此後放糧嚴禁各營官私行剋扣以肅營規成祿疊奉嚴諭催令出關勦賊乃肅城既日久未下復致有營勇潰變之事該提督見在馳回高臺已與楊占鼐會晤即可將肅州軍務交與楊占鼐接辦不得以潰勇滋事餉絀兵單藉口遷延自干咎戾其前奉指撥川餉十萬兩著由成祿專弁飛催以作

料理出關之用並著穆圖善飭令甘涼各屬籌捐糧石豫備該軍出關裹帶由成祿派員催趲星馳挽運毋稍延緩前據都興阿保奏之儘先協領富勒渾記名副都統托克屯著穆圖善查明該二員見在何處軍營卽飭令來京聽候諭旨將此由六百里各諭令知之○諭宋廷春奏剿辦逆匪疊勝克復州縣城池及省垣防守穩固情形一摺滇垣被困日久自岑毓英小板橋獲捷之後派遊擊楊玉科等繞由川境收復元謀復進擣環洲賊巢生擒逆目將武定祿勸兩城先後攻克並克羅次縣城其石虎岡等處踞賊復經李維述等四面堵截殲斃甚多將賊壘全行攻克餘匪向新草房右江館一帶逃竄該省城外南北兩路官軍擊賊獲勝疊復城池剿辦尙爲得手惟富民安甯祿豐等處逆匪來往靡常仍著岑毓英飭令楊玉科等迅將各該城池克復以斷賊援省東一路並

著劉嶽昭嚴飭全祖凱李家福等軍將嵩尋各股賊匪痛加剿洗以振軍威劉嶽昭等俟各路賊匪廓清後再行進駐省垣會辦一切善後事宜刻下省城防務著宋廷春商同馬如龍督率在城文武官紳晝夜巡查嚴加堵禦毋得稍涉疏虞元謀等州縣甫經收復民氣凋殘卽著劉嶽昭等遴選州縣等官趕緊赴任以資撫輯所有前次失守各州縣官員下落並剿匪出力文武及傷亡官弁兵勇等應辦事宜著俟劉嶽昭等抵省時分別辦理將此由六百里諭知劉嶽昭岑毓英並傳諭宋廷春知之○予陝西陣亡提督李佑厚甘肅陣亡遊擊楊永先等祭葬世職○辛丑諭軍機大臣等曾國藩奏劉松山派員回至湖南募勇已飭湖南鹽局撥銀招募並令在直隸添募馬勇請飭直隸等省督撫飭屬照料等語直隸河南山東等省各州縣民團近來仇殺官兵之案層見疊出曾

諭官文等遵奉查辦此次劉松山所募湖南新勇一千七百名行經直隸等處地方尤恐兵民不習滋生事端著官文李鶴年丁寶楨卽檄各屬曉諭居民毋得畱難刁阻以利進行該提督在直隸添募馬勇並著官文責令各該地方就近妥爲照料曾國藩卽檄飭湖南鹽局照數籌撥俾該軍迅速成行並檄該提督轉飭募勇各員弁沿途嚴加管束毋得搔擾地方是爲至要將此由五百里各諭令知之○山東巡撫丁寶楨奏捻逆東竄見飭高唐等縣速修馬頰河隄牆以期兜偏得旨卽著嚴飭各該地方官會同王心安一軍安速辦理並著該撫會同英翰及淮豫各軍嚴遏賊竄毋稍疏懈○廣廣東欽州學額二名○壬寅諭軍機大臣等曾璧光奏川楚各軍攻克偏刀水賊巢黔軍見規龍貴並請飭川楚督撫派員分辦善後川省按月協餉各摺片川楚各軍攻拔偏刀水賊

巢勦撫兼施貴東漸次可望肅清著崇實劉崐飭令川楚各軍乘此聲威將巖阿廟壩餘匪掃蕩卽行移師進拔玉華山尙大坪等處賊巢以清積年巨患龍貴教匪黨與眾多曾璧光見商令張文德親統黔軍由谷脚巴鄉龍山一帶分投進剿爲搗穴擒渠之計俾該逆有所牽制不至與尙大坪等處踞匪援應著該署撫卽行妥籌餉需飭令該署提督迅督將士剋期將此股積匪殄滅不可失此機會李元度業經因病賞假前已有旨令該臬司假滿卽赴雲南新任並將遣撤兵勇挑選精壯帶赴雲南剿賊所有貴東善後事宜卽著崇實派令宣維禮會同署貴東道妥爲辦理並著劉崐酌派楚營可靠之員會同川黔各員一體妥辦曾璧光原片著鈔給崇實劉崐閱看至黔省餉源枯竭已久見值防剿喫緊需用尤急著崇實按照曾璧光所奏無論何款每月撥解銀數萬兩不

可稍有間斷黔省軍務正當順利之時該署督諒能統顧全局不至推諉遲延坐失機宜也曾璧光原片並著鈔給崇實閱看將此由五百里各諭令知之○甲辰允左宗棠奏提洋款二十萬兩解充甘餉○是月豁免湖南晃州廳被擾上年額賦蠲緩山西吉州等十三州縣被擾新舊額賦